



韓 魏 公 集

一









集 公 魏 韓

(一)

撰 璇 韓

原序

宋時稱四傑者曰韓范富歐陽而韓冠其首蓋讀公家傳表奏制策諸篇而知公之所以立大功成大名非無本而能然也余嘗謂立功之難難於有識有量有膽有才四者而公兼之矣公歷事三朝輔相十載其閒任三司擢諫垣出鎮邊陲入參樞密經綸事業難更僕數方天聖五年公甫唱第而日下五色雲輝映殿陛雖同升諸公多至兩府然終能福社稷利人民則舍公誰屬哉公爲樞密時皇嗣未立卽請置內學教宗子及公秉政又論建儲立本繫天下心語甚愷切而英宗卒踐大祚張昇所不能撓慈壽所不能搖款曲調護至進對慈壽之語同列皆爲之恐投杖入見之時曾公以下皆汗浹背而公獨無所疑懼此其深思遠識豈尋常所及者然而公之德量過人抑又難也公嘗言始學行己當如金玉不受微塵之汙及其成德有所容受亦爲無害是以平日與人和易絕無私嫌芥蒂明足以照小人之欺受之而不形於色小人背義欲傾己者辭和氣平視若故常在政府時每議事有至厲聲相攻不可解者公槩置勿問俟其氣定徐一言可否之而彼此皆服歐公性嘗褊輒自歎曰衆百歐修不足望韓公而孫元規亦自訴於公曰汚眞小人公知汚污不知相公其見服於人如此矣抑公平居又謂成大事在膽嘗以彥升爲膽力薄故雖憲直而忠於人而過涉滅頂終非其分上所有然公未嘗許人往往自許也觀其孤忠仗節一遇大事輒以死自處禍福之來非所惑焉用能定策兩朝力扶社稷將在是歟公惟有識有量有膽而才乃

大故續懋西帥得關中之感悅策函樞府底河外之附輸他如指畫機宜周知治體毅然報國之忠直哉匪躬之節弘勳駿烈陵櫟一時其所蘊蓄有由然也噫公誠兼是四者抑余推公之本則又在立身行己一出於誠讀公所爲文悃愞款款鞠躬盡瘁閱五十載如一日也有真經濟然後有真文章宜其興范公富公爭烈矣

康熙四十八年己丑孟冬穀旦儀封後學張伯行題於榕城之正誼堂

曾序

功蓋天下者。其文章或掩於功業。而弗著於當時。然終不能泯焉者。有所託而傳也。非傳之難也。傳其全者之爲難也。英雄豪傑。曠百世而相感。或輯其斷簡於散逸之餘。或新其舊刻於漫漶之際。是則有所託而永其傳矣。有宋忠獻韓魏王。德善功烈。載於國史者詳矣。其大者經略西夏。敵心膽寒。定策兩朝。功存社稷。天下後世。兒童走卒。咸慕其名。而其文集。顧有經生皓首不及見者。今以其全集觀之。爲家傳者十卷。別錄遺事各一卷。詩記雜文表奏書啓制詞冊文祭挽墓誌諸體。又五十卷。要皆經緯化機。根據理窟。豈屑於雕蟲者哉。數百年來。其集不知凡幾。易梓。侍御張公士隆。復翻刻於河東之行臺。殆所謂曠百世而相感者乎。河東都轉運使王君宣。以張公命屬予。引其首簡。誼不容辭。夫以忠獻唱第。而太史奏日下。五色雲見。須臾光映殿庭。其功業文章。可易言哉。至其自謂某爲相。歐陽永叔爲翰林學士。天下之文章。莫大於此。則公之志在經世。而其文有非人所及知者。可想見矣。張公按節巡鹹。興利除害。綽有餘地。旣建書院以正士習。而斯集行焉。他日以文章勳業。鳴於河汾。追媲韓范者。固有所感發而興起矣。況同文之化。遍於海內。讀其書論。其世尚友其人。於千載之上。又豈無望於天下士哉。正德九年甲戌夏五月吉。賜進士中憲大夫山西按察司提學副使齊安曾大有書。

韓魏公文集目錄

卷之一

記序

定州重修北嶽廟記

定州新建州學記

定州衆春園記

定州閱古堂記

并州新修廟學記

相州新修園池記

定州廳壁題名記

新修晉太尉嵇公廟記

諫垣存藁序

文正范公奏議集序

韓氏家集序

韓氏參用古今家祭式序

卷之二

表狀

代三司謝賜內藏庫絲綢表

謝知制誥表

謝降御前劄子表

謝復官表

謝改觀察使表

謝賜詔書示諭表

辭免諫議大夫表

涇州謝差中使宣諭表

賀皇子降生表

遷葬求郡謝賜批答不允表

揚州謝上表

謝轉給事中表

賀鴻慶宮奉安三聖御容禮畢表

鄆州謝上表

成德軍謝上表

定州謝上表

謝賜禁中銀救濟饑民表

謝賜詔書獎諭表

謝表

謝轉禮部侍郎表

謝加觀文殿學士再任表

辭免武康軍節度使表

第二表

謝表

并州謝上表

知相州乞罷節鉞表

卷之三

表狀

辭免集賢第一表

第二表

謝表

辭免祿享加恩第一表

第二表

謝表

辭免昭文第一表

第二表

謝表

辭免登極覃恩第二表

謝皇帝表

謝皇太后表

甲辰冬乞罷相第一表

第二表

第三表

乙巳夏乞罷相第一表

第二表

第三表

災異待罪第一表

第二表

第三表

乙巳冬乞罷相第一表

第二表

第三表

丁未因中丞彈不赴文德殿常朝待罪第一表

第二表

丁未夏乞罷相第一表

第二表

第三表

卷之四

表狀

丁未秋乞罷相第一表

第二表

辭免使相第一表

第二表

謝除使相判相州表

免冊命表

謝賜宅表

永興軍謝上表

戊申相州謝上表

判大名府三年乞閒郡第一表

第二表

第三表

第四表

第五表

北京謝再任表

判大名府再任滿乞郡第一表

第二表

第三表

北京河決待罪表

癸丑相州謝上表

謝賜生日禮物表

賀收復熙河等州表

謝放免勘相州差壯城兵士表

甲寅秋乞致仕第一表

第二表

第三表

乙卯夏乞致仕第一表

第二表

第三表

卷之五

奏狀

乞外任知州狀

辭免諫官第一狀

第二狀

代張若谷密學舉官自代狀

授起居舍人舉官自代狀

授知制誥舉官自代狀

代中書謝歲節御筵狀

代中書謝皇子降生詩獎諭狀

進皇子降生詩狀

應詔舉王居白堪充選擧任使狀

乾元節陳乞姪景淵恩澤狀

移帥陝西緣邊四路謝賜緡錢狀

陳乞姪景先差遣狀

明堂陳乞妻甥杜儀恩澤狀

中書進天章閣觀祖宗御集錫宴詩狀

辭免三司使

辭免樞密使

第二

第三

甲辰冬乞罷相

第二

第三

第四

第五

乙巳乞罷相

乙巳冬乞罷相

第二

韓魏公集 目錄

一〇

第三

第四

第五

丁未春辭免司空兼侍中

第二

第三

丁未秋乞罷相

第二

第三

第四

卷之六

表狀

罷相辭免兩鎮

第二

第三

第四

辭避賜第

第二

乞男忠彥召試中等與館職

永興軍乞移鄉郡

第二

第三

第四

第五

第六

第七

第八

修仁宗實錄畢乞不推恩

辭免河北四路安撫使

第二

再乞只充大名府路安撫使

第二

北京乞就移徐州

第二

第三

第四

卷之七

表狀

到魏二年乞移邢相州

第二

第三

第四

北京辭免加節再任

第二

第三

謝令男忠彥撫諭

到魏三年乞納節移邢相

第二

第三

第四

第五

第六

第七

劄子

到魏四年乞移鄉郡

第二

第三

納北京再任加恩告敕并支賜申狀

甲寅秋乞致仕

第二

第三

乙卯夏乞致政

第二

卷之八

書啓 制詞

與文正范公論師魯行狀書

獻所業上兩府啓

謝直集賢院啓

同前

謝知制誥啓

謝復官啓

謝觀察使啓

上大名知府王龍圖啓

代張若谷密學謝啓

代司封兄上昭文相公啓

代崔勉寺丞謝轉官啓

邊鎮節度使加同平章事制

中書舍人除御史丞制

誠勵風俗浮薄詔

王堯臣除翰林學士制

郭稹除刑部員外郎制

王克基除東上閣門使制

龍昌期等授試國子四門助教制

夏隨除觀察使制

李端愿除西上閣門使制

吳有鄰除駕部員外郎制

王果除諸司使制

江中立除祕書丞制

高繼隆除諸司使制

穆思齊除大理寺丞制

陳道古除大理寺丞制

李迪曾祖在欽贈太師制

卷之九

冊文 祭文

英宗皇帝尊號冊文

代開封知府諸廟謝雨文

揚州祭聖母祠祈雨文

諸廟祭文

北嶽祈雨文

北嶽祈雨文

北嶽祈雪文

北嶽謝雪文

北嶽祈雪文

北嶽謝雪文

北嶽再祈雪文

大原諸廟祈雨文

諸廟謝雨文

蒙山祈雪文

諸廟祈雨文

祭龍圖尹公師魯文

祭文正范公文

祭僕射王公伯庸文

祭正獻杜公文

祭狄相文

祭聾隅先生文

祭范寬之刑部文

祭文潞公太夫人文

祭崔良孺殿丞文

祭資政吳長文文

韓魏公集 目錄

祭安退先生劉君文

祭崔公孺比部文

祭致政學士趙君子淵文

祭少師歐陽公永叔文

卷之十

家傳

卷之十一

家傳

卷之十二

家傳

卷之十三

家傳

卷之十四

家傳

卷之十五

家傳

卷之十六

家傳

卷之十七

家傳

卷之十八

家傳

卷之十九

家傳

卷之二十

別錄

遺事

書忠獻魏王章表後

韓魏公集卷之一

儀封張伯行孝先甫重訂

受業諸子全校

記

定州重修北嶽廟記

天下之嶽五獨北之常方人目爲大茂山而嶽名不著嶽有祠不知廢於何代今廟於曲陽縣之西附城距嶽百餘里考有唐以來記刻皆不載廢遷之由故非質於圖志人或不知嶽之所在焉於禮祀莫大於天地而五嶽次之古者天子壇以祀四望若時巡至其所旣柴然後秩而望祀之廟而祭焉非古也其後世之文乎然則爲之者誠有意焉耳夫嶽然而石坳然而谷泉焉而百派別林焉而萬幹擢嶽之形也倏霽忽冥伏珍見祥喜焉而風雨時怒焉而雷雹發嶽之神也人狎其形而易之也薪於是畋於是安知其所以爲神哉君人者患民之不知也於是廟而像之以警民之耳目致其嚴奉之心使違禍而趨福雖文非古其於教也固益明矣若其視祭之品則三代以降皆以公有唐以王我朝撫有天下馴致太平真宗皇帝紹祖宗之隆以建皇極封泰山祀后土曠絕之禮無所不講由是尊五嶽而帝之復以安天元聖之號表於我神耀世人之未詳也又製奉神述以明之蓋愛民之意深則報神之禮重斯誠也雖萬世可知矣故廟宮之制崇飭宏大惟禮之稱著於定令以時繕修歷年旣長吏職廢怠日風月雨以圮以漏功大

費廣久焉不葺。每歲立冬，天子之所署祀冊，就遣守臣以祗祀事。至則羅其籩豆洗酌之具，與執事者升降於頽簷壞廡之間，退而安然罔以爲恤。慢神瀆禮，莫斯爲甚。慶歷八年夏六月，某獲領州事，得居瀘鎮之下，知廟之未完也。由市材弗給，役徒弗充，而民罹水災，歲以大歉。凡厥用度，弗敢爲擾。會有詔毀鄉民之擅爲祠者，得取其材以濟之。益兵暨工，責成於邑吏，而曠時不集。通判軍州事屯田員外郎游君開謹於其事，願盡力焉。率其縣主簿李奕，畱廟所百餘日，悅使其衆而已焉。弗懈於是，弊陋朽撓之迹，煥然一新。又於其庭起士民薦獻之宇，俾勿亵於神。而神益以尊，彩繪塗墮，罔不精極。宜神之喜，肸蠁來宅。皇祐元年冬十月某日，以訖功來告，僚屬請以鄙文誌於廟石，而弗克讓。夫吏之爲政也，有善惡焉；神之爲監也，有禍福。善焉而以福，惡焉而以禍，神理之宜也。或反是焉，則非人之所知矣。守臣當謹天子之命，而治神之居，潔神之祀，修己以愛其民，人惟神之所以禍福而已。謹記。

定州新建州學記

天與人性不一。聖人欲率焉而一之於善，非學不能也。夫子之言性有三，曰上智，曰下愚，曰中人。謂智愚則不移矣。然而中人之可以上下者，由學與不學乎。昌黎文公曰：「上之性就學而愈明，下之性畏威而寡罪。」夫智者之欲益明，愚者使知其可畏，又必在乎學而已矣。嗚呼，文公之言性，可謂能廣聖人之道，而所勸多矣。故三代之興也，自國家以達乎鄉黨，必有學以教其民人，導其性，使一之於善，以明乎君君臣臣父父子子兄兄弟弟夫夫婦婦之道，然後人安其分，而享國永長，大矣哉。學之有功於治也如此。上之二

十有二年圖講萬化益究元本思迹三代所治之道以仁壽其民始詔州郡皆立學差賦以田俾資其用守臣從風競自崇飾冀有以副天子首善之意而定處北邊承詔者不知其本以謂用武之地學非吾事也獨慢而寢焉又四年某忝命來守未幾仲秋之上丁始躬行釋奠禮於夫子之廟閱舊記始唐大中末州帥盧公簡求以廟本會昌所廢天祐佛祠其制猶若浮屠氏所居乃更而大至天祐中王公處直本朝開寶中祁公廷義祥符初李公允正皆能於兵寇之餘因其極廢而復興焉後之爲此者不能繼四人者之用心故日復驟削至是室宇垣墉頽壞垂盡由闕以內鞠爲汙萊獨夫子之堂以巨材堅壯不能摧撓而上覆穿敝泄落風雨升降薦獻僅無所容屬歲方大饑詔停土木之役退而歎憤志期必葺後二年農里屢豐邊陲無事乃命禮賓使定州路駐泊都監張君僕選督工徒以新廟宮功費之大實均改作凡再踰月而廟完於是卽廟建學市垣北之地通而廣之以規以度不陋不侈講授有堂肄習有齋庖廚井匱生生之具無不備足較其功費復倍廟焉又再踰月而學成乃以七月十九日甲辰具牢醴率僚屬以告於先聖而延諸生焉噫夫子之教天地也凡爲人者孰不戴履之捨天地將安之乎故文武一道也惡有二焉昔夫子亦嘗學焉而後識其大者故曰我戰則克晉列國也猶用詩書禮樂之帥卒伯諸侯是知爲儒而不知兵爲將而不知書一旦用之則茫然不知其所以克之之道而敗辱隨之其所謂用武之地學非吾事者是真不知其本者也今上之廣學也將養育天下士之秀者使各正其性以明乎三代教之之道內充於己以待用故或取之爲公卿大夫郡縣守長百執事皆能以其道佐吾君宜吾民交修乎小大

之職以至於海內大治而上得以高拱而無爲如未用也則使宗族稱其孝鄉黨推其賢朋友服其忠信樂天知命守死善道而已若其破碎經史掎摭聲病專以篆刻之技苟竊仕進不思富己之道時而發之則非天子所欲迹三代所治之道以仁壽吾民之本意學者其勉之謹記

定州衆春園記

天下郡縣無遠邇小大位署之外必有園池臺榭觀游之所以通四時之樂前人勤而興之後輒廢焉者蓋私於其心惟已之利者之所爲也彼私而利者不過曰吾之所治傳舍焉耳滿歲則委之而去苟前之所爲尙足以容吾寢食飲笑於其間可矣何必勞而葺之以利後人而使好事者以爲勤人而務不急徒取戾焉吾不爲也噫彼專一己之私以自利宜其所見者隘而弗爲也公於其心而達衆之情者則不然夫官之修職農之服田工之治器商之通貨蚤暮汲汲以憂其業皆所以奉助公上而養其室家當良辰佳節豈無一日之適以休其心乎孔子曰百日之蜡一日之澤子貢且猶不知況私而自利者哉中山之地自唐天寶失御盜據戎猾兵革殘困民不知爲生之樂者百有餘年至我朝而後始見太平亭障一清生類蕃息不有時序觀游之所俾是四民間有一日之適以樂太平之事而知系聖仁育之深者守臣之過也非公於其心而達衆之情者又安及此乎郡城東北隅瀦水爲塘廣百餘畝植柳數萬本亭榭花卉之盛冠於北垂蓋今宣徽李公昭亮始興之後實廢焉予之來懼陷其心於不公也復完而興之凡棟宇樹藝前所未備者一從新意罔有漏缺又治長隄鑿門西南隅以便游者於是園池之勝益倍疇昔總

名之曰衆春園。庶乎良辰佳節。太守得與吏民同一日之適。游覽其閒。以通乎聖時無事之樂。此其意也。後之人視園之廢興。其知爲政者之用心焉。皇祐三年正月某日記。

定州閱古堂記

慶歷八年夏五月。天子以河朔地大兵雄。而節制不專。非擇帥分治而并撫其民不可。始詔魏瀛鎮定四路。悉用儒帥兼本道安撫使。而定以不肖辱其選。既讓不獲命。至則竭愚修職。尚懼不能稱上。所以付與之意。退而思迹古名臣之軌躅。以自策勵。且患其汨於多務。而志之弗虔。會郡圃有壞亭。歲久不葺。於是廣之爲堂。既成。乃摭前代良守將之事實。可載諸圖而爲人法者。凡六十條。繪於堂之左右壁。而以閱古爲堂名。夫古猶今也。古之人爲屏翰。授鉄鉞。而能成異政。立奇功。而今或不能者何也。蓋其待己也必賢。而足其報祿也必利。而安持是以望政成而功立。不其難哉。如曰古人能之。予反不能之。日夜以勉焉。又安有不至者耶。今予之所爲也。誠以己之道未充。而君之祿殊厚。任重塗遠。惟仆蹠之是虞。故在燕處之間。必將監古以自勉。其未至也。則雖紛肴觴。競笳吹。四時之景。交見於前。予方仰而愧俯。而憂。孰知夫樂之爲樂哉。其少進也。則雖吏文之擾懷。邊責之在己。予固得其道而處之。至於幅巾坐嘯。恬然終日。予之所樂惡有旣乎。若其賓客之於斯。僚屬之於斯。不離几席。如閱舊史。俾人人知爲治者。莫先於教化。用兵者。莫貴於權謀。而俱本之於忠義。功名一立。不獨身享富貴。而慶流家宗。其餘風遺烈。可以被於旂常。傳於簡策。邈千萬世。而懷然如存。咸有聳慕之意。不以酣歌優笑之爲樂。而以是爲樂。則予也豈徒己之爲

益是將有益於人知我者其以我爲喜爽墮遂娛賞而已乎後來之賢與我同志必愛尙而增葺之宜免夫毀圮壞之患矣謹記

并州新修廟學記

三才各有主四時大運主於天萬物大生主於地人倫大化主於人夫子曰於道何主曰主其中者也然天地之主或不能常焉而吾夫子之主雖終天地而不變也凡爲人君爲人臣爲人子者能勉而及吾夫子之主則其國治焉其家保焉其身安焉雖天地之主有時而戾固無預乎吾之所及然則人之道孰先於吾主哉有天下國家者可不知其本乎先儒稱夫子者多矣獨杜牧之謂自古稱夫子之德莫如孟子稱夫子之尊莫如韓吏部蓋言堯舜莫賢其德而社稷莫偕其尊誠哉後之學者雖欲極言而增大之又孰加焉惟郡縣守長得施其教者能興學以恢其德崇廟以稱其尊斯可以達其本者也太平興國四年太宗皇帝平僞劉一天下壞太原故城徙州榆次又三年復遷於唐明當時經始者乘用武之後慮弗及遠不知并據都會異日爲一道之本凡城隍官府門戶衢陌之制一從苟簡不中程度視夫子之廟尤爲不急置城之東南隅體陋而削僅有祠所景祐中康靖李公若谷首卽廟建學得賜田贍學徒而人始樂教慶歷初文烈明公鎬又建禮堂於夫子之殿北而講始有容然皆因仍故基地愈偏隘其後生員浸廣至坊東西序所圖諸弟子室而處之二時釋奠三獻從祀官與學生執事者不能偏列於庭半立廟門之外皇祐五年春某忝被州寄受署來謁知於禮之瀆而未皇改作始奏隰州司戶參軍牛景充教授以專

學職。明年秋大穰。民安事簡。於是馳使東魯。得仙源廟圖像冠服之實。買民廟北地。命崇儀使并代州營內兵馬鈐轄張僕右侍禁兵馬監押王守恩集工視役。徹其舊而一新之。然後廣殿。耽然而雄。眸容儼然。而尊顏。氏以降諸弟子。孟氏以隆諸大儒。或像而侍。或圖而列。次序於堂廡之間。煥然大備。復徙廟東州兵之居。以置學。南書樓。北講堂。東西齋舍。廟學異門。又設射侯於廟學之間。以備男子之習。至於起居飲食之事。必嚴其所俾。稱是焉。自始事底訖功。凡度材治基。逮塗茨丹牘之細。一須官用。無及民者。夫廟學之新。其於爲治之道。竊有志達其本者。而諸生其達學之本乎。今飾公齋。萃公書。潔公食。日授經月課文。昧其教者。苟曰此欲吾藝之精。取進士科富且貴而已。噫。如是則吾學乃教人竊祿之地。非有望於諸生也。夫精藝而求仕。末也。得仕而行道。本也。然不由其末。則不得施其本。故由末而仕。其末不可用而本或不存焉。非竊祿何哉。且晉之俗。陶唐氏之俗也。吾夫子之道。二帝三王之道也。豈習俗之易。而習道之難哉。蓋習俗易者。其法傳。習道難者。其學廢。今學興矣。處吾學者。其務外勤於藝。而內志於道。一旦由茲而仕也。則思以其道爲陶唐氏之臣。心陶唐乎其君。心陶唐乎其民。能如是。吾始謂之達其本。至和元年某月某日記。

相州新修園池記

相於河朔爲近藩。而地據形勝。西走鎮定之衝。屯師積穀。與邊鎮相左右。然當無事時。州之武備。日懈不嚴。至五兵不設庫。散處於廳事之廊廡間。敗壞堆積。莫可詳閱。郡署有後園。北通牙城。東西幾四十丈。而

南北不及百尺。雖有亭榭花木。而扼束蔽密。隘陋殊甚。牙城之北。乃有官蔬之圃。縱廣半夫。中有廢臺。歸然荆棘蒙沒。州人但以其基正圓。有道回環而上。如螺殼然。故以抱螺名之。雖老胥宿校。不能知興廢之由。予之來。雖以病不堪事。然猶不敢偷安自放。而忘治之所急。於是闢牙城而北之。三分蔬圃之地。其一居新城之南。西爲甲仗庫。凡五十六閒。由是兵械百萬計。始區而別焉。以庫東之餘地。通於後園。由是園之南北。始於東西均焉。又於其東前直太守之居。建大堂。曰晝錦堂。之東南建射亭。曰求己堂。之西北建小亭。曰廣春。其二居新城之北。爲園曰康樂。直廢臺鑿門曰通之。治臺起屋曰休逸。得魏冰井廢臺鐵梁四爲之柱。臺北鑿大池。引洹水而灌之。有蓮有魚。南北二園。皆植名花雜果松柏楊柳所宜之木。凡數千株。既成而遇寒食節。州之士女。無老幼。皆摩肩躡武。來游吾園。或遇樂而畱。或擇勝而飲。歎賞歌呼。至徘徊忘歸。而知天子聖仁致時之康。太守能宣布上恩。使我屬有此一時之樂。則吾名園之意。爲不誣矣。觀吾堂者。知太守仗旄節來故鄉。得古人衣錦畫游之美。而不知吾竊志榮幸之遇。朝夕自視。思有以報吾君也。登吾臺者。西見太行之下。千山萬峯。延亘南北。爭奇角秀。不可繪畫。朝嵐暮靄。變態無窮。俯視郛郭之中。民閭官寺。伽藍膚廬。與夫花顏柳色。紅綠交映。燦然如指掌之上。一無遺者。而知太平興此。爲我屬歲時休暇優逸之觀。而不知吾亦自謂能勤於作德。然後處茲而休且逸也。夫予始以武備不嚴。不敢以疾而忘治之所急。而因得志其榮遇。以及衆人之樂。則是舉也。豈無益之爲哉。故直書大槩。并告來者。夫郡縣之爲政。有期而更也。政有所利。非一人能保其久也。前倡之後繼之。推其心以公而相照。則國家之

事無不濟者。況一園池之末哉。葺之廢之。必有能辨其心者。時至和三年三月十五日記。

定州廳壁題名記

郡縣守長有記於廳事之壁。前代無聞。唐始盛焉。當時名儒所述。則謂壁記非古也。若原地理條物宜陳。山川之形勝。與風俗之好尚。則圖牒存焉。其所取者在乎彰善而志惡。名氏遷次亦云末也。夫能推名氏以見善惡。謹遷次以尊王命。亦春秋之事也。雖於古未著。而今可廢乎。河朔並邊之郡。以十數。而定宿大兵據戰地。故朝廷所寄之重。不與他比。慶歷八年夏五月。始詔魏瀛鎮定四路帥各兼安撫之職。定之帥領定、保、深、祁、四州。廣信、安、肅、順、安、永、寧、四軍。凡兵民之政悉主之。首是任者。非得文武兼備之才不可居。而誤及愚者。故臨治以來。惕然自勉。以思報稱。幸時既久。吏民軍旅率相信順。事日簡。得以補綴闕漏。因訪國朝以來爲州者之次序。將刻石以傳焉。而吏曹狃於武事。不以圖籍爲急。壞敗忘缺。卒不可究。若但取近年可記者書之。則又義無所本。今故以朝廷更制之始爲首。尊睿圖而勸新治也。夫已之爲政。是否固不可以自明。必俟後人迹其行事。然後善惡詳焉。則予與來者旣鑄其名氏。揭諸聽斷之所。朝夕視之。思不愧於後人座右之誠也。可不謹乎。某謹記。

新修晉太尉嵇公廟記

夫以忠事君。人臣之常分也。然遭大變。臨大節。或心無所主。爲禍福所動。以苟一時之生。而貽萬世之戮者多矣。若其鼎鑊在前。鋒刃加己。能挺然知義之所在。分固當爾。輕其命若鴻毛。然卒死而不顧者。幾何

人哉。惟晉侍中贈太尉忠穆嵇公，則其人也。方惠帝昏弱，諸王肆亂，各萌僭奪以相屠害，故帝之北征也。公馳赴行在，力當國難，而成都王潁以兵犯乘輿，衛從奔散，獨公端冕侍側，以身扞帝，至血濺御衣而殞。嗚呼！公之知義明分，可謂處得其死而不爲難也。故其大忠偉節，赫然與日月爭光，崒然與山嶽爭高天，地知不可窮，而公之名亦不可窮矣。宜乎百世之下，有國家者，欽遺風，想餘烈，置祠奉祀，永永而不絕也。相之湯陰，卽公死難之地，其廟在焉，前之爲邑者，不知追顯忠義爲政所先，因循不葺，底於大壞。今令張君祿至，則首拜祠下，覩其墮敝之甚，驚而歎曰：茲不職之大者也。亟舉公事迹，與夫朝廷崇祀之意，諭於邑民，民皆欣然，願共力以完之。令乃寬與之約，聽自營辦，不數月而祠宇一新。於是民益知夫大賢之忠於國者，雖死於不幸，後世必載祀典，嚴廟貌，奉事尊仰之。如此皆思勉而爲善，自一邑而推一郡，由一郡而推諸四方，則其爲勸也，豈小補哉？廟完，具書來告，以余嘗兩守鄉邦，願志本末，噫！忠義之心，人皆有之，但勉而不力，執之不固，遂不至於古人。余亦勉而執之者，跂忠穆之風，尤寤寐以自激。文雖甚陋，惡敢客而不書？時熙寧三年八月十五日，具位韓某記并書。

序

諫垣存橐序

夫善諫者，無諷也，無顯也。主於理勝而已矣。故主於諷者，必優柔微婉，廣引譬喻，冀吾說之可行，而不知事不明辨，則忽而不聽也。主於顯者，必暴揚激訐，恐以危亡，謂吾言之能動，而不知論或過當，則怒而不

信也夫欲說而必聽言而必信苟不以理勝之爲主難矣哉琦景祐中任三司度支判官以族貧求外補得舒州將行而上以諫官缺擢授右司諫而畱之竊惟言責之重非面折廷爭之難蓋知體得宜爲難夫得通明端樸高識博學之士則動必中理日益君聽而使愚不肖者冒而處之固不勝其任矣遂兩上章辭不報乃喟然自謂曰上之知汝任汝之意厚矣汝之所言當顧體酌宜主於理勝而以至誠將之茲所以報陛下而知任之意若知時之不可行而徒爲高論以賣直取名汝罪不容誅矣在職越三載凡明得失正紀綱辨忠良擊權倖時人所不敢言必昧死論列之上寬而可其奏者十八九卒免重戮進登掖垣實前自爲誠之力也其所存橐欲斂而焚之以效古人謹密之義然念詩書所載從諫而聖君之德也衰闕而補臣之忠也前代諫諍之臣嘉言讜議布在方冊使覽之者知人主從善之美致治之原若皆削而燔之則後世何法焉於是存而錄之離爲上中下三卷命曰諫垣存橐以藏於家竊志夫上之聰仁大度自三代漢唐以來虛懷納諫甚盛德之主皆所不及復俾子孫傳而閱之知直道之無咎忠教之有迹云時慶歷二年三月十五日秦亭西齋序

文正范公奏議集序

某嘗謂自古國家之治否生民之休戚在人不在天人或不然之今於文正范公然後知其說之勝或者不足疑而於教之有補也公以王佐之才遇不世出之主竭忠盡瘁知無不爲故由小官擢諫任危言鯁論建明規益身雖可絀義則難奪天下正人之路始公闢之其後恤災南方扞寇西垂貳機政陪宰席宏

謀大策出入仁義。朝思夕慮。條疏深切。志欲膏澤中夏。鞭笞四夷。使我宋之基萬世不拔。不幸經遠而責近。識大而合寡。故其言格而未行。或行而復沮者。幾十四五。逮公之亡也。聞聽所及。莫不咨嗟感慟。惜公所蘊。不克盡施於世。甚則推諸天。謂人謀之不足爲也。嗚呼。公之所陳用於時者。大則恢永圖。小則革衆弊。爲不少矣。其未用者。今副橐所存。爛然可究。一旦朝廷舉而行之。興起太平。如指掌之易耳。此天乎哉。必在乎人而已矣。次子寺丞君輯公遺文。得奏議十七卷。政府論事二卷。以某昔帥西兵翊內樞。與公並任。而出處之與公同也。俾序以冠其首。夫以公之文武兼備。乃靖王室。朝野所論。謂道之亨塞。時之重輕。率繫公之用不用。則其德業之著於天下也久矣。惡假鄙文而後知哉。但以忝緣僚舊。飲公盛美。義不敢讓。且慰賢嗣之意云。具位某序。

韓氏家集序

某家本深州博野人也。世以官學知名。遭唐末亂。達難屢遷。以是家牒散而不完。先祖令公善繼素業。深以譜系爲重。乃取祖考以來墓銘所存者。集爲一編。首自爲序。其意欲傳示子孫。永無窮。及先君令公之葬。祖考也。亦親爲誌。所次先烈甚備。自先君之亡。家世文集所掌不專。四兄爲孟州司法。盡取先君文集之官兄物。故嫁辛氏。攜以歸。其家不能辨識。盡亡失之。其先祖所集墓銘一編。在家又遺脫大半。存者首尾十數幅而已。某自成立。痛家集之散缺。百計訪求。十稍得其一二。而所集著墓銘者。終不可得。每自感念。未嘗忘心。至於冥禱天地神祇。亦冀萬一有獲。慶歷三年。自陝西四路帥召爲樞密副使。三代皆及

贈典而曾祖妣忘其姓氏。閱所存墓銘，則有清河郡夫人之誌。遂以張氏追封，後再詳之。張氏乃四代祖鼓城府君夫人也。雖辨其誤而無如之何。四年秋，謀先君之葬，得起居舍人直龍圖閣尹洙爲誌贊。善大驚喜，遽問其目，則曰：「書題草也。」次日得之，視其目如其言，且慰且恨。及反覆披究，則難以他文先祖墓誌亦在焉。參考祖先事迹，益以明白。驗曾祖妣乃史氏也。亟請書石者，獨未書姓氏。郡封是冬遇郊恩，卽追正之。噫！是辛君者，若稽數日不言，亦後於事矣。孔子謂孝悌之至，通於神明。豈小子念親之至，而神所報乎？後之子孫，其可怠哉？因感其事，取五代祖而下及諸宗屬所爲文章，編爲六十卷，仍以墓誌行狀及授官告辭冠於首篇。命諸子姪人錄一本，以藏於家。後主之者，或不謹嚴，使失其傳，則上天至明。祖宗至靈，是必降殃以懲不孝，其戒之哉？其戒之哉？謹序。

韓氏參用古今家祭式序

自唐末至於五代，兵革相仍，禮樂廢缺，故公卿大夫之家，歲時祀饗，皆因循便俗，不能少近古制。國家運祚隆赫，承平有年，曠絕之典，無所不講。慶歷初元，始詔文武官並許依舊式，刲立家廟，事下禮官裁處。而迄今不聞定議。某自主祭以來，恪謹時薦，罄極誠懃，而常患夏秋之祭闕而不備，從俗之事，未有折中。因得祕閣所有御史鄭正則祠享儀，御史孟詵家祭禮，殿中御史范傳正寢堂時饗儀，汝南周元陽祭錄，京兆武功尉賈氏犯廟諱家薦儀，金吾衛倉曹參軍徐閏家祭儀，檢校散騎常侍孫日用仲享儀，凡七家研詳。

朞月。麤究大方。於是採前說之可行。酌今俗之難廢者。以人情斷之。成十三篇。名曰韓氏參用古今家祭式。昔鄭御史以年六十三。久疾羸頓。遂著祠享儀以示後。而某年之與病。與鄭適同。遂感而爲此。將使子孫奉而行之。非敢傳於外也。若其歲時之享。以新儀從事。雖甚疲老。敢不自力。他日朝廷頒下家祭禮。自當謹遵定制云。時熙寧庚戌歲十月十五日。北京望宸閣序。

韓魏公集卷之一

表狀

代三司謝賜內藏庫紬絹表

臣某等言。準中書門下牒。今月八日詔敕。伏蒙聖慈於內藏庫特支撥紬絹二百萬疋。賜三司者。禁財中發。實出於上仁邦計外充。蓋無於私積。恩頒下及。慶悚交深。中謝竊以乘用之宜。聿歸司會。經費之度。咸出縣官。惟賦調之有常。或荒災而致乏。爰崇上術。尤屬熙辰。恭惟尊號皇帝陛下。執粹凝圖。寶慈惇治。茂輯寧人之務。精窮觀化之原。修八政以厚生。遐稽往喆。愛十家而興儉。覓軼前徽。式是先猷。存諸內府。量彼地征之入。收其歲取之餘。非主羨贏。本期均節。向以農疇失稔。聖慮通權。薦捐國帑之珍。俾濟公家之急。故得高穹監善。協氣開祥。坐還富庶之風。允洽登平之望。而猶豐凶在念。損益求中。戒車利以傷苛。貴寬民而與足。誕宣優詔。垂察攸司。載蠲繪帛之饒。更助歲時之給。仰出綸之施惠。在罄宇以蒙休。臣等備位天臺。尸官計部。秋毫析利。罕詳經世之謀。春澤流恩。徒樂阜民之化。敢不增研心畫。祇佩官箴。彌修底謹之方。益究懋遷之理。冀陳薄效。少答鴻私。臣無任。

謝知制誥表

臣某言。伏奉制命。特授臣依前起居舍人知制誥者。青蒲獻議。曾微補袞之勤。黃闕程文。俄玷演綸之任。

省讞材之無狀頤成命之已行荷寵兼常撫躬增厲中謝竊以禁局清切居官爲榮帝制坦明作訓攸重向匪機靈敏給才辯高奇善循四禁之規雅擅一時之譽則何以徊翔近掖宣暢鴻猷雍容侍從之聯振復典謨之體宜甄時望以協朝僉如臣者緒迹至孤器姿無取幼奉楹書之誨早親童篆之工幸對聖明復玷辭等藩條闡決罔詳施教之宜儒館並游寢被育材之化擢贊尹京之治易參司會之煩首公則勞稽效誠寡庖鋒不振奚彰批竚之能阮族甚貧遂有出塵之志輒露抗章之請方諸爲郡之行伏遇尊號皇帝陛下開道求言勵精修政俾停使竹之授畱責諫囊之忠越被恩升力思毗益每弗虞於禁忌始自竭於愚鴟物論皆危天意無忤建歲勞之三易微穴見之一長豈謂聖度包荒宸襟采善俾沿科選之舊進居辭職之崇躍龍鳳之池亟塵清貫漸鴻鸞之黨榮廁寵班敢不磨鈍忘疲修方匪懈誥令之出勉追深厚之風名節所持靡蹈諛邪之徑庶盡捐軀之報仰酬當辰之仁臣無任

謝降御前劄子表

臣某言遞中降到御前劄子二道伏蒙聖慈以近爲賊犯渭州山外亡失主將具狀待罪許臣別圖來效以刷前恥者敗軍有法本不期貸責效以恕使得盡死中謝伏念臣識暗經遠才屈任重偶以童篆末技優竊科等幸遇天下無事方垂徹警專修俗吏之業罕究兵家之學屬以羌落背惠王師興伐朝廷用不求備俾參西略臣自念狂賊桀驁邊民被毒人無愚知奮身願效況臣竊識忠義能不憤激故受命引道無敢固辭赴職已來朝計夕慮思有所立上寬聖懷以至馳奏廷中方授成算還趨塞上亟整師屯而兇

渠併兵親犯隴外臣素料其至先集衆軍猶慮勢分遣其齊進不謂諸將恃勇致此敗覆雖指縱可驗似不愧心而職事有墮理當請罪伏蒙尊號皇帝陛下燭幽垂察含垢示慈謂李廣數奇非由失計孟明三敗終能贖過薦頒溫詔許竭後勤臣敢不嘗膽以思枕戈自勵劇寇尚在豈還朝之可期素志未伸庶捐軀而後已臣無任

謝復官表

臣某言九月二十七日樞密院遞到告敕各一道伏蒙聖慈授臣起居舍人者謀軍而敗獲罪當然使過以恩勸功斯在寵光所暨愧慄無從中謝伏念臣稟賦顚庸緒迹寒替偶緣末學誤中甲科驟歷榮階繼塵劇任奉身以直居職惟公逐巧者目爲愚夫養高者謂之俗吏出於聖鑒擢備諫員荷寵既深獻誠必盡屢刺權豪之失不虞家族之危仰恃特含容僅逃放逐逮易官於注筆旋書命於詞垣自右蜀告饑高奴覆將薦驅使傳親諭國靈有利輒言無疵不去所期還闕少遂息肩朝廷以未殄賊巢方開帥府進預樞機之直俾參經畫之權雖兵旅之宜素非習練而人臣之節當冒險艱拜命引塗忘軀殉難周旋邊徼蒙犯雪霜薦賞武材則罷懦者皆忌激揚忠憤則苟且者如讎一昨平涼之西會虜來寇臣聚師以待定謀而行偏校爭先弗遵於節度衆寡莫敵終及於撓亡讒胥競搖怨府交發諍臣論事亦謂當誅宸眷念勤獨明非謬止從削秩尙委典城惟茲天水之雄式控隴關之要氐羌雜處輿賦甚繁臣寢不及時食忘其味力圖後效勉贖前辜重裘禦寒姑自修而作誠積毀銷骨實衆口之未平不謂睿聽通微宸襟錄舊特

申昭洗亟復舊聯顧曩質之在生諒煩言之寢弭斯蓋伏遇尊號皇帝陛下體天育物以器任人謂獵犬無功匪自指縱之誤覆益委照逮開日月之明庶令負釁之臣得遂棄瑕之用敢不精研策慮謹布教條明斥堠以謹邊勵貔貅而禦侮收桑榆之木或振翼之可期竭犬馬之誠誓墳壑之爲報臣無任

謝改觀察使表

臣某言今月九日樞密院遞到告敕各一道伏蒙聖慈授臣前件官者當兵旅之任姑欲正名付廉察之權誠非稱職被恩不次以榮爲憂中謝竊以帥十國而爲連蓋資屏翰長萬夫而觀政宜拔英豪儻容濫居曷濟國事伏念臣以儒承業以文干用偶預雋選擢亞舉首恥緣科級坐取貴塗凡隸官曹絕去苟且以至參京邑之劇贊泉刀之繁諫署竭愚詞掖書命處身必以其道出言不敢及私心竊愛君遂忘於己禍性專任直弗虞於衆嫉屢犯禁忌久當放流時人甚危聖意彌簡而自凶渠背惠西府置官不圖妄庸亦備推擇驟進直於樞府俾參畫於戎事夙夜以報庶揚天聲偏佐之專卒墮虜計尙徙邊而薄罪徒補過以盡勤惟秦之雄爲塞甚重控制六郡羈屬雜羌旁阨寇衝俯臨關要臣但能招懷種落訓戢營屯起城壘以安人平獄市而清訟斥堠斯謹備豫必周爲術固疏責實安在朝廷旣已遷復官次增重使名臣之非才大越涯分不謂薦膺異數益峻寵階卽爲治之本邦委觀風之茂寄私門胥慰物論稱優此蓋伏遇尊號皇帝陛下若古宣猷宜人聞化究弛張之大體恢緩御之遠略致茲頑朽繼荷采甄重念臣素匪將家早塵詞等平進之漸往式具存誠以疆鄙未安忠憤攸激力冒艱險志平僭狂顧軀命之可捐豈資

品之爲較奪鳳池而不賀前哲堪嗤刺貊庭之無功羣言是恤惟祿廩之加厚非寒素之所貪敢不精練武經日求勝算指縱加審扞防必嚴與賊俱全是焉深愧爲噲等伍烏敢自羞或稍著於微勞願特還於舊物誓堅死節仰答宸私臣無任

謝賜詔書示諭表

臣某言樞密院遞到詔書一道伏蒙聖慈諭臣已除本州觀察使且從廩秩之優益慰戎行之望者成命之行庶乎開曉溫言以及責若龍光惟素志之所存懼清衷之未悉敢茲陳露良切震兢中謝伏念臣早以藝文妄干祿仕幸遇尊號皇帝陛下首臨軒陛優擢科名序進之階前規盡在而臣乃情吏事盡力公家自結聖知了無私援一昨羌酋背義帥府需才誤置選中卽馳塞下經畫遷徙通踰三期爲國之謀固無云補在臣之分亦用傾竭彌膺督護之任已明委注之隆不期霈恩又出非望驟易樞廷之直俾分連帥之權臣受寵無名撫躬自度不敢遠稽典故上瀆睿聰竊記陛下纂極以來此例甚少李維李士衡以老疾榮俸陳堯咨以侈性尙豪並遭遇承平各充其欲故議者惜臣茲授謂匪美遷臣但以處不避汙事上之節讓而就賤守道之常當朝廷憂邊之秋非臣下擇官之日辭之則有可疑之迹掇希求進用之嫌受之則有從權之名協軍旅稱呼之便況國家推公興治任人有次必不令臣永沈武列老於疆垂或薄效之可甄宜舊物之來復臣是以難於拒絕泰然居職今承詔諭之意專示廩秩之優緣臣清白奉身出於門法豈牽豢養之厚自損名節之高茲爲伍於冗流冀同心於外禦伏望皇帝陛下考勸功之法御知

臣之明察臣甘去近聯主於恭順謂臣卽當重祿靡在貪饕儻一辨於愚誠誓愈堅於忠報臣無任。

辭免諫議大夫表

臣某言今月九日三班借職趙九皋齋到官告敕牒各一道伏蒙聖慈授臣樞密直學士右諫議大夫者萬樞之府更直爲榮七諍之班在官惟重廁舊聯而甚寵當新秩以無名理有未安讓非敢飾中謝伏念臣早由孤直誤記聖衷麤幹米鹽之煩本無軍旅之學而自勉膺中詔來捍西垂三載於茲寸功莫就雖天仁所覆姑務貸全而疆事不修何施面目惟徇忘身之節絕萌干進之心向奉制函就更廉印從權爲便稱職誠非辭避靡諸塵竊增愧一昨寇侵鄰道移督援師徒號萬兵之行無及一毫之助遂使國威重挫虜氣益驕蓋臣不能乘閒襲歸應機取勝上轉旰宵之慮合從斧鉞之誅豈謂伏蒙尊號皇帝陛下過采虛聲亟申褒典顧敗軍之若是豈行賞之爲宜執可自欺固有公議重念臣爰從郎署獲改使名幸近職之已還冀前官之并授儻加異數實素彝章伏望皇帝陛下念邊鄙之未寧謂沮勦之當謹止復禮曹之命特停諫省之遷如此則犄角禦戎更求於實效糜捐報國益勵於愚衷其所賜告敕臣未敢進納干冒旒冕臣無任

涇州謝差中使宣諭表

臣某言今月九日入內內侍省內侍殿頭李允亨至伏蒙聖慈傳宣爲日近差除兩地臣僚未差除聞已指揮中書劄記候將來邊事稍寧詔卿用在兩地非擬議亦非臣僚奏舉特出朕意宣諭卿知兼令臣密

舉臣僚代臣邊任者聖眷特深將圖不次之用臣愚屢省竊懷失職之憂於義當陳斯言敢妄中謝伏念臣西畫疆事於今衆年雖勵敢爲之心曾微必勝之效偏裨失律既有罪而不誅援助發兵復無功而被賞尙畀中權之峻仍兼四路之崇恩重報輕任隆材謫捐軀以義乃身膏斤斧之秋歸闕何顏絕生入玉關之望豈謂伏蒙尊號皇帝陛下仁惟及遠道本推公因弼臣拜命之初念窮塞宣勞之久密加寵諭前許近司斷自清衷不緣他議顧蒙鄙之榮而良厚於國家之慮則非長蓋以逆吳約和未分誠詐宿師經戰僅起瘡痍臣與范仲淹日極謀維麤詳方略願少寬於銜勒得自竭於歲時庶能施尺寸之勤上以副朝廷之寄如其禦戎無狀曠日爲虞則乞擇材傑之臣使之爲代明竄殛之典以警在邊臣固不敢先自舉官涉於希進惟幸高明之鑑俯矜切至之誠臣無任

賀皇子降生表

臣某言伏覩進奏院報皇子降生者穹昊垂休元良載誕矣盛之期增赫重輝之采采光凡在幅員率同慶躍中謝伏以尊號皇帝陛下睿明正統兢翼凝猷紹三后之丕基覽八紘之洪緒旰宵求治勤儉化民果聖嗣之寢昌示璿源之滋衍吹銅導氣式協於嘉辰齒胄從師卽成於懿德永扶天業克耀儲闈臣恪守窮邊竊聆熙事預班朝之列莫趨交戟之嚴輸就日之誠徒效傾葵之意臣伏限官守在遠不獲蹈舞闕庭臣無任

遷葬求郡謝賜批答不允表

臣某言伏蒙聖慈以臣上表陳乞知相州或近鄉里一郡躬親營護墳域特降詔旨不允許臣襄宅有期卽當暫往者請郡以奉先塋雖違素願賜告以護親葬亦示優恩麤安人子之誠特出聖宸之惠中謝伏念臣彌由睿選擢貳樞庭方圖報以盡勤敢求安而自逸蓋以早從穉歲二親則亡贊竊榮階諸兄繼謝比緣西事久在兵閒顧封樹之未諧每肺肝之如割逮塵重任正偶利年尋得地於故鄉已涓辰於遠日臣嘗私自省度至於再三視輶車而弗親行實孝心之不忍處近位而求便假必物議之有云與其貪寵以抑情孰若避賢而申志是以輒由衷而露奏冀解職以爲藩豈謂伏蒙尊號皇帝陛下念進退之匪輕欲公私之克濟曲頒綸詔親諭玉音俾襄事之如期卽馳騁而暫往感深存歿榮耀摺紳敢不砥節愈堅挺身思奮他人之憚行者臣不憚他人之難言者臣必言儻犬馬之未先誓糜捐而無避臣無任

揚州謝上表

臣某言伏蒙聖恩授臣資政殿學士知揚州事已於四月五日到任上訖臣謬參樞筦無補盛明人言已騰君量猶恕祕殿之資甚寵廣陵之寄絕優過爾被恩得無懷愧中謝伏念臣樸忠守道天賦難移孤直任真聖知有素常以親逢亨運早廁清塗不宜因循以負驅策屢膺煩劇之任偶逃罷輒之譏自元昊僭狂西垂震動乃承人乏薦領帥權雖無成功實盡死節不意曲矜久次擢忝近司固讓莫諧竭愚思效凡陳鄙議皆出至誠慮邊計則冒朋黨之疑斷國論則恥依阿之說會險人之肆忿窺時事以興誣爰從親葬之還獲視篋書之謫旣詳矯妄因得指陳願付宰樞示於臺諫閱茲虛罔之狀卽驗中傷之情臣自以

叨備臣鄰，乃來詆訾，不可更塵重任。有玷公朝，尋伏私居，乞行顯罷。伏蒙尊號皇帝陛下察無他過，尙錄舊勤，深惟進退之間，必存堂陛之體。俾兼美職，出守便藩，舟楫安流，浹旬受署，重念朝廷求治疆鄙，僅寧臣內，不能協贊籌帷，精講致平之策，外不能周旋塞壘，力營預備之謀，而乃宴處名城，坐尸厚俸，庇親自足，臨政少憂。於臣身則麤安，在臣志則未報，敢不導宣寬詔，慰撫編氓，米鹽之務必親，獄市之繁無擾，士師當黜，固枉道以弗爲，卽墨免烹，諒毀人之終辨，誓稟不渝之操，仰酬惟睿之仁，臣無任。

謝轉給事中表

臣某言：今月二十七日進奏院遞到敕牒一道，官告一通。伏蒙聖慈授臣給事中，仍放朝謝者，官以歲稽雖存著令賞，非功懋曷弭。弭羣言引讓，則取疑於未成，受命則不勝其多愧。惕焉屢省，莫知所安。中謝伏念臣幸偶聖朝，早塵科等，常恥養高而圖貴近，每願竭節以報國家，周旋俗吏之爲，激切諫囊之論，不虞擅斥，蓋恃聰仁以至去禁掖而卽邊戎，捨儒冠而服武弁，惟殫千慮，冀緩憂勞，敢有一言輒辭危難，逮羌人之送款承召，節以來朝，擢貳機繁，無容懇避，愛上之心愈篤，忤時之咎寢彰，尙賴保全許均優逸，自膺淮海之任，實居吳粵之衝，城閘墮殘奸訛，固結旣思繩葺，必務躬親，常人所非，則曰未詳大體，微臣自視可以少贖素餐，僅涉再朞，率無治狀，豈謂伏蒙尊號皇帝陛下御天地之量，錄日月之勞，申舉舊章，進升寵秩，拜於瑣闈，更視深嚴，刺以貊庭，重貽嗤謔，敢不動思合道，守不易方，惟忠義之所在，始終而一致，期於效死，庶可酬恩，臣無任。

賀鴻慶宮奉安三聖御容禮畢表

臣某言伏覩南京鴻慶宮奉安三聖御容禮畢者商丘之地王業所興乃述舊規以新原廟圖三后顥昂之表申四時休惕之懷熙事克成普天同抃中謝伏惟尊號皇帝陛下以唐堯之仁睦親族以虞舜之孝事祖宗道格至平民知大順而猶慮列聖之游有所未奉盡物之薦有所未虔經制或墮清衷是念乃眷別京之重實惟開國之基靖館夙嚴眸容攸宅再謀崇葺式示欽承儻功之初展禮咸備事遵簡約本達於至誠天之監臨宜輔於盛德臣限拘官守不獲奔赴闕庭臣無任

鄆州謝上表

臣某言伏蒙聖慈就差臣知鄆州軍州事已於今月五日到任上訖須句重地爲國東屏宜擇名臣宿望委之鎮臨輕付匪才懼不勝任中謝臣聞人之所稟也非大賢哲不得其全故黃霸長於治人及入爲輔弼則風烈衰焉何則材有所偏而用有所適也是以聖王在上馭臣布職必以器而使之伏念臣樸懶鄙陋無一可取徒識忠義自謂難奪迺者處煩劇備邊鎮効死以報或有塵露之益豈謂伏蒙尊號皇帝陛下特加憐察謂可倚任擢在樞府預聞國議臣不敢渝其所守愈思自竭而識闇才拙動取乖忤宜從擯黜復何矜全治揚二年乃免過咎尚承恩記移此便藩臣已舉家乘舟由清河路不一月日直抵城下雖冒大暑不知其勞土風甚淳官事亦簡在臣所得爲幸實多昔賢治人之長非臣敢及庶能宣朝廷寬大之詔令百姓知上意慈仁不使貪苛之吏外瀆風化夙夜惟念以勤撫恤冀有補助少贍素餐臣無任

臣某言伏蒙聖慈就差臣知成德軍府事已於今月三日到任上訖東藩五月薦舉政條北道一廳頑更
守任以忠則忘奔走之苦以才則誤寄責之深撫已一思悸汗交集中謝伏念臣從官素拙立朝至孤獨
膺聖知遂玷樞近嚮補郡之逸益懋首公之勤而自滿歲淮南改州汶上顧日月之未幾亦吏民之頗
安弗遑定居驟爾易地此蓋伏遇尊號皇帝陛下軫守方之念推任舊之誠乃眷常山之雄實據全趙之
勝將帥未明於紀律士卒或稔於墮驕付以懦庸倅之振葺狡免未死再圖獵犬之勞謗虎本無已判市
人之妄敢不究綏靖之理裁訓戢之宜寒柝外嚴不忘於備豫邊營入奏勤密於事機少分宵旰之憂庶
有塵露之益臣無任

定州謝上表

臣某言伏蒙聖慈就差臣充定州路都部署兼安撫使兼知定州軍州事仍降詔旨不許辭免已於今月
十四日到任上訖竊以中山控邊素號雄重地形坦易無陂澤之阻先時虜騎入寇必趨是塗故國家常
聚重兵擇名將以制其衝自約和以來不忘備豫至於守帥之任未嘗輕以屬人然而敵稔於因循兵驕
於閑放聖慮經遠赫然改圖當此之時臣謂宜得文武兼備之才使撫靖而訓輯之不意猥以及臣臣退
自省度懼不能副朝廷寄責之重避讓莫獲無所措躬中謝伏念臣徒守樸忠無他績效一辭樞柄三易
郡符兢兢營職苟脫罪咎豈謂伏蒙尊號皇帝陛下天地之度愛而全之念求舊以惟人不使人而求備

於北道更制之始。首膺選用。荷恩誠厚。量力固憂。況今狄人講歡。務惇大信。經畫之任。最爲難處。凡百措置。不可默然。而或必振頽綱。則張皇之沮及。遂仍故態。則宴安之患深。伏望皇帝陛下。究易調之原。察理繩之漸。少寬衡策。俾盡驅馳事。或建明特加裁察。臣敢不外圖扞蔽。中戢營屯。動存機慮之先。或有萬一之補。忘身殉國。此臣夙心。臣無任。

謝賜禁中銀救濟饑民表

臣某言。入內供奉官高懷政齋敕到州。伏蒙聖慈支賜禁中銀五千兩。令變轉救濟闕食人民者。天運難測。固有流行之災。民食弗充。上貽宵旰之慮。不責大農之給。特疏中禁之財。濟此饉荒。出乎仁惻。中謝臣聞堯水湯旱。非政之使然。金穰木饑。乃歲有常次。故王者能察時艱阨閔。俗困虛。必裁救恤之宜。遂亡捐瘠之苦。伏惟尊號皇帝陛下。以憂勤嗣大業。以約儉恢永圖。德無遠而不柔。惠雖微而必浹。宜膺敷錫。以格太寧。而涉夏以來。苦雨爲沴。惟茲北道。最失西成。納隍深軫於聖懷。振廩重侵於經費。卽馳使指。遠諭宸慈。且頒內府之珍。以續翳桑之命。天之肆害。方不堪其怨咨。上所施恩。已頓寬於餓殍。臣才非通敏。任忝撫綏。奉詔札之丁寧。痛農疇之乏絕。敢不躬宣睿旨。申誠屬封。期共拯於疲羸。使咸知於愛育。臣無任。

謝賜詔書獎諭表

臣某言。七月二十五日進奏院遞到詔書一道。伏蒙聖慈。爲去年河北艱食。人戶流亡。以臣擘畫拯救。特賜獎諭者。北土之饑。近歲未有。非上之大恩。過於天地。則民之衆命。委諸溝壑。顧守臣之所竭。惟君命之

是虔忽被詔褒得無心愧中謝伏念臣賦才甚短爲政少通自易塞垣卽逢水害流庸以死者皆是餧粥而濟者幾何洩官廩以從權則文符之交戾破郡豪而取辦則城野之俱空故於賑卹之方務適公私之便其利溥則或時而冒禁所益衆則不敢以愛身職雖盡勤患且奚救幸遇尊號皇帝陛下深惟邦本上惻睿慈以斯民未安爲大憂以經費少侵爲末事德音一發罷悴頓蘇使傳交馳慰存良厚訖蒙再造盡出至仁而臣任忝撫綏歲罹艱阨莫副吁宵之念坐貽尸曠之羞敢謂聖度兼容宸聰過聽特示璽書之勸蓋爲邊部之光臣敢不載策駕屏動思獎勵當此饉災之後更圖安集之宜使閭里之間漸期復貫則疆垂之下自亦無虞稍脫罪誅茲爲報塞臣無任

謝表

臣某言三班借職劉仲舉齋到官告敕牒各一道伏蒙聖慈授臣資政殿大學士仍賜對衣金腰帶鞍轡馬及奉聖旨不許辭讓者賞旣優而未諭蓋省無勞讓雖至而復當固非獲已惟進退之難處在斯須而弗安中謝伏念臣才本無他志期有立常覽古人之忠義以至於涕零矧逢真主之聖明是堅於死報山海之大何益犬馬之誠則然故入贊樞機必乃情於萬務出居屏翰亦盡力於一方圖富貴豈臣之本心竊祿位是臣之深恥惟茲守塞僅甫踰年徒能革兵之墮驕無以救民之刦敝過爲之慮動則幾於闊疏苟幸其安日可須於罪黜豈謂伏蒙尊號皇帝陛下天地之度堯舜其仁謂內外雖殊孰差於輕重簪履至賤尙惜於墜遺乃眷舊臣咸均寵數不圖庸近亦玷褒榮重躋祕殿之聯實駭愚儒之守避焉而弗獲

其請受焉而莫得其名再叩慈宸則有飾僞昔時之謗遂塵美職則有無功冒進之譏與其違衆而取嫌曷若被恩而思效偏僂承命慙羞在顏臣敢不服夙夜之勤副國家之遇方垂無事奚由奮勇以答君鼎鑊在前誓不臨危而變節臣無任

謝轉禮部侍郎表

臣某言今月十六日進奏院遞到敕牒一道官告一通蒙聖慈授臣尚書禮部侍郎加食邑五百戶仍放朝謝者禮成合宮澤被率土蓋興久墜之典則有非常之恩凡在庶工皆踰素望中謝恭惟尊號皇帝陛下法古堯舜致時成康以大孝奉乎祖宗以至誠答乎天地曠絕之儀罔不講吉蠲之薦罔不躬而猶虛孝有所未申誠有所未達乃訪總章之舊式因路寢之嚴享太微之精兼盡報天之意配文考之聖參修事祖之勤建訖明禋亟覃殊慶第錫官師之寵且推福祚之餘而臣竊守邊遐薦擢歲饉駿奔率職既莫助於國容愛利及人曾未寬於上顧不謂均禧之始亦膺進秩之榮當有位之交歡理難獨讓揣無功而自訟內實多慙敢不益勵樸忠勉驅鴛猥疆垂效力雖終老以無辭旒辰知臣在殞生而孰報臣無任

謝加觀文殿學士再任表

臣某言今月二十五日姪男太常寺太祝正彥齋到官告敕牒各一道伏蒙聖慈授臣依前行尚書禮部侍郎充觀文殿學士仍令再任及放朝謝者滿歲復畱已示寄邊之重議功無實何勝進職之優荷信任則義不可辭拜光寵則愧無容地中謝伏念臣賦性專樸遭時盛明過蒙仁聖之誤知惟恐忠義之不足

二垂所效一紀於茲挺然思報於國家倏爾已成於衰病究疆場之事幾寢食之俱忘於進取之心固夢寐之無及矧此中山之會最居北狄之衝自分道而新睿圖以非才而叨帥任當兵卒橫驕之後乘歲時凶歎之餘得不世出之賢猶難訓治使甚愚者之慮奚足戢安遽越代期分甘公黜豈謂伏蒙尊號皇帝陛下天無不覆器之使人念考績之踰時貴守方之有法深惟古制莫重久官將垂經遠之規寢革數遷之敝特申褒典更責後勤任不辭難蓋推誠之所激讓非中理雖冒賞以無嫌敢不益謹備虞動存綏靖俾吏民之愈信致師旅之增和生入玉關可謂前人之墮志心居魏闕不忘疏迹之愛君苟未挂於吏文終有裨於廟勝臣無任

辭免武康軍節度使表

臣某言今月日某官齋到告敕伏蒙臣慈授臣武康軍節度使知并州河東路經略安撫使兼并代等路兵馬都總管者守邊再閏久實何功申命廣朝寵斯爲誤矧元戎之寄重兼大鹵之地雄驟付匪才其如清議中謝伏念臣守惟任拙性不通時徒知忠義之可爲雖在顛危而莫奪而自奮身西鄙待罪北疆周旋一紀之間勤苦二垂之事積憂成瘁由壯得衰方欲上叩慈宸請更便郡庶少全於生理願在備於死官豈謂伏蒙尊號皇帝陛下度材之宜惟舊所任念一臨於朔部適五及於歲暮載惟并晉之區並控羌胡之會俾專節度仍委撫綏而臣素忝學儒粗能審分塞防之責既念重而難辭旄鉞之來豈無勞之可受自顧猶是羣言可知況今蠻徼未賓王師致討欲人心之競捷在賞典之推公伏望皇帝陛下察寸誠

之不欺。究二柄之當謹。特追還於使節。止就領於帥臺。如此則名器不可假人。免騰嗟誚。辱祿所以厲世。足勸勳能。幸知臣之至明。期得請而後已。臣無任。

第二表

臣某言云云者。君恩一出。猶慳改於已行。臣分再思。願懇陳於當讓。終期得請。是免愧心中謝。伏念臣早由書生。久服武事。豈貧愚有欲於利。蓋忠憤不知其勞。茲臨朔垂。再及歲閏。務益煩而雖勉。神過用而已疲。方求便安。少養衰拙。不謂誤膺聖念。復責邊勤。并土之控二疆。敢辭奔命。洋川之抗六纛。自省何功。較其冒寵之必殃。不若避榮而獲戾。伏望尊號皇帝陛下。俯矜危悃。謂出至誠。俾仍帥領之權。且觀來效。亟寢節旄之授。以待勞臣。敢不強率尪孱。愈圖報塞。憂邊思職。冀盡力於兵閒。竊位素餐。免致譏於天下。臣無任。

謝表

臣某言。二月二十八日。樞密院遞到詔書一道。伏望聖慈。以臣陳讓武康軍節度使不允者。寵若驚而自視。其實何勞。讓如僞以雖誠。固難愈請。荷詔慈之加昂。顧邊責之匪輕。於義莫辭。措身無地。中謝伏念臣進由孤直。知自睿明。不敢苟富貴以作身謀。惟以報國家而爲己任。服西北二疆之事。幾光陰一紀之間。日有百憂。官無寸效。不覺寒暄之易變。但驚精力之早衰。苟乘障以自安。亦未免好權之謗。欲請藩而少便。則涉乎避事之疑。夙夜以思。進退不可。豈謂伏蒙體天法道。欽文聰武。聖神孝德。皇帝陛下。大度天也。

至仁陶唐念宿業之且勤不責人於兼備就易帥臺於并上特加使纛於洋川薦需德音促當成命臣竊上循朝意再揣官宜十稔之前嘗被察廉之寄三垂所次悉專督護之名今茲節制之行始正營屯之任避焉莫得愧弗能勝敢不力究民瘼謹修成律義之所在知熊掌之難兼命或可捐若鴻毛之甚易臣無任

并州謝上表

臣某言伏奉制敕授臣武康軍節度使知并州河東路經略安撫使已於三月十七日到任上訖國家經畫三垂實最他道置帥大鹵獨控二疆非有將略可以摧狄心吏術可以救民瘼或輕而授固不克勝中謝竊惟晉陽之提封蓋本唐堯之舊化俗儉而家給土豪而兵勁雖有水旱之沴而無凍餒之虞自西事之興屯戍茲廣人疲遠餉戶及橫斂重以和糴積欠而輸筭姦錢亂法而幣輕故今物力未甚完罪辟日以衆亭候無驚而兵費猶冗羌胡久附而邊吏或懈伏惟尊號皇帝陛下以恩德浸諸夏以威信柔外夷顧茲一方素號襟要思擇帥守安而治之而臣信道雖篤應變不長乘障中山徒歷再閏訖無實效上裨遠圖聖念矜全未賜顯黜復加旄鉞付此重寄詔旨敦諭弗容避辭臣敢不中夜以興當食而廢審富庶之良畫較備禦之長算使編氓曉悉於上意殊俗震讐於天聲若其報君之大方則當投死而後已臣無任

知相州乞罷節鉞表

臣某言奉敕差知相州仍以臣棄表乞守前官赴任伏蒙聖慈降詔不允已於今月二十三日到任上訖
守邊不可以疾居誠宜引分求郡莫如於鄉便冀一均勞所祈使鋟之還蓋協帥臺之罷君仁至厚止易
地以推恩臣寵無加遂擁旄而歸里榮兼今昔義激死生中謝伏念臣自忝決科則思陳力非微驅獨不
自惜幸明主得其親逢故常奔趨險艱如履平地顧視權利輕於浮雲當人之不欲爲則保完難必處事
之易及責則憂患常深志雖不回病已中作尋竊自忖較其所長人神之勞過焉斯斃天光之蘊定然後
明與其勤死而無成孰若少休而再效爲慮旣審露章不疑幸遇尊號皇帝陛下德治普天愛存舊物輟
御醫而來視知賤疾之匪常特徇至誠許辭重寄不奪洋洋之節就更河亶之封踰旬解裝行路無苦遂
得均頌牛酒慰舊老於鄉中羅列旌幢拜先臣於墓下不徒歎聳於當世實足夸傳於後來臣敢不論病
以體國之宜攻疹以及民之瘼怡然靜守保於至和苟臥瘴沈痼之可瘳雖疲未棄則據鞍饗鑠而思用
有急當先誓畢餘生仰酬洪造臣無任

韓魏公集卷之三

表狀

辭免集賢第一表

臣某言伏奉制命特授臣依舊工部尙書同中書門下平章事集賢殿大學士仍加食邑食實封者樞筦無功方期自効疑丞有缺驟爾叨榮雖公恩之非常在公議則不可夙夕震駭莫知所安中謝竊以王者端拱穆清責任輔相內使萬物無不遂外使四夷無不恭陰陽協於時是曰燮和之效卿士得其職斯爲選擇之明天下繫其安危國體隨而輕重所付一失爲害豈輕如臣者樸學非長孤忠自信蚤慕古人之行已不能枉道以進身立朝以來皆上所悉自羌庭之叛命去詞掖以臨師周旋兵閒竭盡死節僅息塞防之警入參幾務之微一簣障河欲得災而不顧叢輕折軸終積毀以難勝尙塵祕殿之資屢忝要藩之寄疲鷺將麌善御猶勤更帥領於二垂遠威顏於一紀忽嬰危疾幸假本邦延屏適養於餘疴宥密亟還於舊物卒無他技倏已踰年縱顯黜之未加亦素餐而自愧豈謂伏蒙尊號皇帝陛下高天廣覆厚地博容不求備以取人奉無私而臨下出於睿斷擢正宰司方今人安承平俗尙苟簡革弊者目爲生事謗必交與擢才則指以樹朋巧焉求中生靈已困而倉廩未足戎狄難保而備豫未完茲朝廷大有爲而及時豈淺薄不稱職而可任況簪紳之近列皆棟幹之美材不此詳求豈無遺滯伏望皇帝陛下特回聖慮謹

擇高賢使施設之一新必太平之坐致如此則使人以器免懷過分之憂惟君知臣雅得量能之道儻垂開可更誓糜捐臣無任

第二表

臣某言伏奉制命云云尋具表陳讓蒙降批答不允者臣聞天下安而注意相蓋以仰成官不備而惟其人無容敍進故避賢之爲請誠度德之匪堪瀝懇未渝措躬無地中謝竊以前記之載治道可詳雖有甚盛德之君必擇非常人之輔所以五臣佐舜十亂翼周蕭曹魏邴繼美於漢朝房杜姚宋相輝於唐室固以聳風烈於萬世不獨致太平於一時豈在聖辰所宜輕授伏念臣早繇科選亟漸寵階天與至愚頗沛必思於忠義人嗤拙宦周旋不避於艱難白首三垂鴻毛一命賴清衷之獨照致危迹之終全遂起病餘復玷樞任犬馬之報增激螢燭之光幾何坐易歲芳日孤人望豈謂伏蒙尊號皇帝陛下不遺小善務取大方曲矜簪履之微驥有鼎槐之拜雖聖人之存舊物特示優恩顧賢者之抑下陳豈無公議撫躬自省通夕如燔是敢再達讓封重干宸聽願敷求於全德俾宰正於庶工必能膏澤四方廣矣庶官之遂丹青萬化煥然王度之明使陛下協能官人之詩免微臣獲不知量之過至慈垂允輿論乃安臣無任

謝

臣某言伏奉制命云云尋再具表陳讓蒙降批答不允仍斷來章者右府本兵之重曷贊幾微中台象極之崇遽叨選任自顧非才之及此必非公議之所容荐拜讓封訖無可報俯僂祇命覩羞在顏中謝臣聞

聖王不以獨化爲高必置相而圖治賢臣不以極位爲樂貴行道以濟時上旣勞於所求下亦難於所遇故求之得則仰成於庶務待以不疑遇之合則協力於萬機果於自效固可以日興頽弊坐致太平生靈蒙福於九圍君臣垂美於萬世恭惟尊號皇帝陛下堯仁舜孝湯智禹勤言動不諫而未嘗過爲道德是富而無一他好而猶念天下已治而恐啓於亂天下旣安而預防其危精擇輔臣以裨至化而臣學無根本性多滯迂不知前世建治安之原徒愛古人立忠義之節周旋俗務眇未嘗勞塵樞府以議邊尙詳梗槩玷鼎司而論道何所開陳忝冒以來夙夕無措蓋以陛下有置相圖治之聖而臣非行道濟時之賢何以仰副天心俯慰人望然陛下旣已求臣之誤亦當待以不疑而臣所堅遇主之誠惟誓果於自效勉企前哲動思至公庶幾民底小康時無大沴少寬待旦之慮免累知臣之明填壑未聞期報如此臣無任

辭免祿享加恩第一表

臣某言伏奉制命特加臣同德守正功臣并食邑實封者講上儀於宗廟方成孝饗之能廣太嘏於辟公首被慶恩之渥冒榮爲過顧已弗安中謝伏念臣早以孱愚誤膺眷任進歷樞機之重擢聯丞輔之崇夙夜以勤揆一心而雖至才謀之短稽衆論而愈喧屬丁閏祿之期獲相親祠之禮精純所致顧肸響以來歆陟降無違在贊明而何有及此受釐之始亟塵差賞之優錫號褒功增封衍食省無勞而若是惟力讓以爲宜伏望尊號皇帝陛下攬二柄之公體萬機之謹俯矜危懲追請命書如此則維鶉在梁免速聲詩之誚若金用礪更加磨切之忠臣無任

第二表

臣某言伏奉制命云云尋具表陳讓蒙降批答不允者祭之爲澤雖有國之常經賞不以勞亦爲臣之當讓奏封斯確詔答未渝退自省顧不勝憂畏中謝伏念臣進繇孤直任玷弼諧常待罪以弗自安敢僥幸而不知量此屬欽修曠典祇事闕宮舉歷朝未行之儀成羣主合食之禮辟公咸暨慙無顯相之容福祿旣均首被便蕃之命顧冒塵之可愧敢辭避之匪誠聖聽莫回愚衷愈惄伏望尊號皇帝陛下據公以議懋德必先稽惟名不假之言徇所欲必從之義亟收誤寵明勸有功庶鳬鵠之分獲全則犬馬之心盡報臣無任

謝表

臣某言伏奉制命云云尋再具表陳讓蒙降批答不允仍斷來章者登羣主而序昭穆甫畢親祠肆大告而均福釐俄周率土忝被臣鄰之列首膺優渥之恩避讓弗渝省循無措中謝伏念臣性直而憲識暗且疏徒知忠義以事君不顧險艱而效死危塗屢躋鴻造終全薦司樞筦之繁進領鈞衡之重聖主之責愚相其可容誅倦令之治薄民烏能知化自須明黜免累至公幸遇尊號皇帝陛下守位以仁奉先惟孝謂郊而祀天地雖三載之躬行廟以合祖宗則歷朝之未講此時思而舉墜屬閏祫之丁辰能饗休成霈澤滂被惟是鼎槐之近特先綸綺之襄增唐閣之美名衍漢封之多邑賞斯爲誤義不容辭敢不祇奉國經勤宣上德協心以濟朝得衆賢之和弼教於中福有庶民之錫冀逭素餐之責少裨旰食之勞臣無任

辭免昭文第一表

臣某言伏奉制命特授臣行刑部尙書同中書門下平章事昭文館大學士監修國史兼譯經潤文使仍加食邑食實封者臣聞天之明堂尊曰上相國之家宰冠於六卿七政從而後觀四海倚之均一建官之重推象可知豈容非才遂得次補中謝伏念臣學不根道智非逮人徒知忠義之敢爲獨荷聖明之垂諒嚮繇樞筦擢備鈞衡幸遭時而得君有同心之輔政夙夜圖報歲時趣過經遠所存卒無近效竭誠之得不免衆嗤上誤一人之知下騰多士之誚惟思引避敢覬寵遷伏遇尊號皇帝陛下大度包荒鴻仁廣愛悉其心之頗至恕其力之未任猶矜駑孱謂可驅策屬此元臣之眷忽罹壽母之憂不忍奪親而傷恩終聽執喪而得禮亟蒙序進殊失僉求方今當極泰之時稔積習之敝遽然更化則議論難齊徐以收功則責望方峻而況天時未順民困弗充水旱相仍災異數見誠聖人恐懼大有爲之日顧愚臣謙薄無所取之材恬然冒榮罪不容戮伏望皇帝陛下念祖宗至重之業推天地大公之心謹擇時賢稽參物論宜得魁傑非常之佐以副焦勞求治之勤使百度修明萬靈和喜則陛下高拱而揖堯舜羣臣相讓而歸皋夔如臣甚庸願寢成命臣無任

第二表

臣某言伏奉制命云云尋具表陳讓蒙降批答不允者冢卿之缺烏可序遷衆議之公豈容非據拜章以讓承詔未愈夙夜震營莫知所措中謝伏念臣起於孤官麤識大忠許國忘身故不論其險易推誠遇物

蓋無別於恩仇人嗤其拙而臣不可移臣執是愚面上卒見信以至再陟樞機之重對司鈞軸之崇聖主仰成恨無所報僚賢一意知豈不爲然而志雖廣而才不能周任既重而力終取困凡於施設動得詆譏加災沴之薦臻在變和而當罷豈謂伏蒙尊號皇帝陛下無求速效尙責遠圖屬元宰之遭憂亟大庭而申號特從次補益駭羣情且論道者本不備而惟人祿德者非衆日而取貴必若以資而遂進則其於勸也誠難伏望皇帝陛下博選眞賢上裨至治況內有雍容侍從之列皆傑出之材外有文武屏翰之臣悉老成之舊少精聖慮自協僉言夫臣何堪敢冒茲寵幸寢已行之命庶全則哲之明臣無任

謝表

臣某言伏奉制命云云尋再具表陳讓蒙降批答不允仍斷來章者大號式孚理雖難復非才自視懼不克堪讓憇繼陳愈音卒客拜寵恩而斯誤質公議以何安中謝臣聞元首之任股肱貴不墮於萬事冢宰之佐邦國在能正於百官惟朝廷之重輕繫選任之得失擇人之謹自古爲難如臣者樸學非長孤忠鮮助自優塵於科等恥平步於貴階周旋俗吏之爲慷慨壯夫之節邊囊外謹謗篋中煩幾汨沒於風波荷照臨於日月樞庭薦陟宰柄參持念嘉會之親逢惜良時之易失同心交儆衆敝力蠲治本所先亦麤施其一二人事未厭蓋久樂於因循毀旣積而增危任不勝而當譴幸遇尊號皇帝陛下高明廣覆博厚兼容巍然執契之尊深得馭臣之要以謂任人之道圖舊所以知之詳勸士之方重祿所以須其報故茲遷擢遂及虛辱敢不博引羣賢大明衆職躋民仁壽之域務廣聖猷俾后堯舜之心勉希前哲庶幾拙效少

答君仁臣無任

辭免登極覃恩第二表

臣某言伏奉制命云云尋具表陳讓蒙降批答不允者大君膺歷綿宇推恩澤逮羣元宜至微之必浹寵先四近顧無狀以何勝輒上奏封冀還渥命聆詔音之未可揣愚分以難安中謝伏以先皇帝仁如高天容則厚地自詩書之所載冠今古以無前興儉守文致成康之美俗先知傳聖得堯舜之大公皇帝陛下奉若先猷纂隆大寶中外稔聞於聖德謳歌允協於天心慶賜之行幅員同抃臣叨塵輔翼素乏材謀當聽斷之惟初在贊襄而何有褒榮驟及震慄無從伏望皇帝陛下攬國權綱新民耳目黜陟大柄必本於無私左右弼臣俾全於難進亟追誤賞以勸多方上化之行必捷置郵之傳命臣衷所報更堅忠義以忘身臣無任

謝皇帝表

臣某言伏奉制命云云尋再具表陳讓蒙降批答不允仍斷來章者睿聖膺圖肇覽八紘之緒幅員需澤交歡萬國之心眷惟丞輔之臣首玷便蕃之寵無容避免徒極兢慙中謝竊以讎省邇聯地亞珥貂之貴天臺上列官推司馬之崇爰自近年罕嘗兼拜如臣者性惟甚懶學不能醇偶熙運之寢昌竊殊科而獲仕孤忠自立衆毀交騰先皇帝察惟直之無他謂顓愚之可任擢躋顯近力主單平奔走三垂有殉國忘身之志周旋二府乏佐王經遠之謀逮升冢席之榮益起素餐之誚避賢奏牘方上印以輸誠喪考纏悲

忽攀髯而發慟。伏遇皇帝陛下不承大統。光紹慶基。盛德之新聲。萬方而咸覩。湛恩之降。浹四海以無垠。故此弼臣特先異數。俾正名於宰任。復增重於官儀。仍遷公爵之優。更益邑租之厚。俯僂之辭莫遂。庸駑之分。何勝敢不謹極冰淵。守堅金石。良時易失。惟勤拙者之爲。高位疾頗。常蹈古人之戒。少裨至治。上答殊私。臣無任。

謝皇太后表

臣某言。伏奉制命云云。尋再具表陳讓。蒙降批答不允。仍斷來章者。龍德在天。慶一人之纂極。陽春布澤。浹四海以蒙休。惟是弼臣首膺褒典。辭甚堅而莫遂。躬屢省以無容。中謝伏念臣早竊榮科。寢階廡仕。自信鄙夫之守。特深先帝之知。外禦疆垂。五玷師權之重。入參樞筦。再塵機務之繁。逮進陟於冢司。固取輕於人望。適露請藩之奏。遽承憑几之言。伏遇皇太后殿下。坤德居中。母儀形外。翊皇明而增煥。協聖治之有初。爰霈大恩。咸均庶位。顧惟蒙陋。前忝龍光。峻卿列於中臺。正宰名於黃闕。仍優封爵。益厚食租。令如汗以靡收。寵若驚而自失。敢不任責歸已。竭誠在公。以道事君。勉著經邦之效。無功受祿。終期上印之歸。臣無任。

甲辰冬乞罷相第一表

臣某言。伏以四時助天。尚有爲而必去。大臣佐國。豈不能而可居。茲省分以退身。幸推仁而從欲。中謝伏念臣早繇科選。寢被寵甄。不知直道之難行。徒以孤忠而自進。仁宗皇帝矜其少憲。待以老成。慶歷之初。

已贊近樞之重嘉祐之始復還幾務之崇亟踐宰司過膺冢任惟心祈報謂時敝之可更其術之疏質人情而愈戾方求引罷免玷弼諧忽悲軒馭之登天獲奉舜躬而受歷永昭置使既畢九虞長樂復權肇新獨斷欲貢避賢之請俄推進秩之恩面謝之辰言陳備極愧冒塵之爲久加尪瘵之日增止俟首冬懇辭重柄此愚誠之上叩蓋睿聽之前知伏望皇帝陛下圖治有初任良爲急引天下之才以自輔采廷中之議而必公不私一臣遂收全美聽還印綬出守圭符蕞爾之軀儻少休而未殞確然之守固臨事而不移臣無任

第二表

臣某言近上表乞罷相任出補外藩蒙降批答不允者輒傾愚悃冀解冢司承詔未渝措躬無所敢再披於肝膈固莫逭於竄誅臣某中謝臣聞駑馬之材駕雖十而終勉鼯鼠之技能有五而遂窮分不可踰過之必敗如臣者素無遠策麤識大忠特膺先帝之知驟忝弼臣之冠歲芳屢易人望日輕廊廟之言卒愧負薪之鄙功名之減無偕治郡之時適貢囊封願還柄任遽號弓而茹痛方奉璫以參儀前懇莫伸厚顏無已此蓋恭遇皇帝陛下睿謀天發聖斷日新宜登進於真賢以輔成於至治豈容衰朽尙爾冒塵伏望皇帝陛下曲霈鴻私與全晚節許罷台衡之重俾紓郡紱之榮欲竭之神苟漸蘇而復觀甚難之務惟所用以無辭臣無任

第三表

臣某言近再上表乞罷相任出補外藩蒙降批答不允者兩上奏封願還宰柄仰愈晉而尙闕顧衰迹以何安重此披誠終期賜可臣某中謝竊以高位之處古人戒乎疾顛大名之居君子恥於難副故知而退則全止足之分昧而進則蹈危亡之機臣雖甚愚敢忽斯義伏念臣自塵侍從卽走疆垂當兵戈未艾之辰有夙夜服勞之苦逮參樞務亟領藩條繼守兩邊又幾十稔比踐更於二府倏九見於周朞以寸心而慮萬微以一身而當衆責力雖自任疾已交攻儻不止於夜行必溢先於朝露譏咍中外玷辱國家矧今論道嚴廊悉皋夔之舊德宣威巨屏皆方召之傑臣至於貴近之聯率富經綸之業伏望皇帝陛下照孤誠之不妄矜悴質之無堪收攬衆賢左右新政使臣退安便郡獲保殘軀上以彰大君含育之恩下以息多士紛紜之議惟堅素守上答至仁臣無任

乙巳夏乞罷相第一表

臣某言伏以王者之尊作命存乎必信人臣之分知退本於不能茲再避於冢司幸前膺於聖諭臣某中謝伏念臣駑馬之賤任重而斯歷畫餅之僞循名而則虛徒以誤知先朝竊位二府自冠臣鄰之重益慙矧復繁機外擾故疾中狀精神日極於昏疲形貌衆傷於癯瘠比傾血懲上叩睿慈冀從出守之求少遂養疴之便皇帝陛下以謂情雖可憐去匪其時俟仁廟之終祥許囊封之請罷德音在耳律候當期願回天地之私亟假麾符之寵君言勿戲翦桐之錫猶封鄉郡獲歸衣錦之榮孰再誓捐軀命仰答恩仁臣無

任。

第二表

臣某言近上表乞罷相任出守外藩蒙降批答不允者比披丹赤仰叩睿明君命有孚固指期而當罷天衷莫測猶可詔之未頒撫已以思措躬無地竊以嘉善而矜不能者君人之全度進賢而退不肖者興治之大方故不能與不肖者畱則下無所勸善者與賢者之抑則政將甚疵臣雖至庸敢害公議臣某中謝伏念臣蚤繇孤進亟陟近司報國之心雖竭忠而自許致君之效卒充位以無聞包羞十稔之間積愧衆賢之上向者幸遇皇帝陛下躬親聽斷中外乂安嘗比上於封章願少休於罷茶俄膺召對竊記德音茲再露於懇誠蓋前祇於訓諭伏望皇帝陛下不牽私愛特示至公知臣不能而可矜謂臣不肖之宜退許還相紱俾任鄉邦馬牛之力麤完必思軀策天地之恩再造曷報生成臣無任

第三表

臣某言近再上表乞罷相任出守外藩蒙降批答不允者非才決去爲濱誠煩優詔弗俞示恩良厚雖已殫窮於賤懲不能感動於清衷得非斷以常情謂非本志匪過邀於聖寵則外迫於人言勉辭要權苟備禮數逮降斷章之答因爲固祿之資臣之所陳蓋不近此臣某中謝伏念臣自玷二府於今十年竊稽桑朝之任官雖有名相之在位得如茲例且無數人況臣齷齪何能區區自守廟堂之上不過俗吏之施爲搢紳之間動有迂儒之閑笑加以蚤膺驅策備歷艱劬積憂日耗於精神奇疾潛生於臟腑比雖自力寢

覺難支故於前後之封章備著憫誠之激切方斯此懇必復上言伏望皇帝陛下深惟萬務之繁特謹四鄰之選不曲全於舊物示公進於眞賢令臣只守本官退安散郡名優治俗庶希黃霸之清風心切報君敢慕赤松之高蹈儻暫休於犬馬期再效於涓塵臣無任

災異待罪第一表

臣某言伏以人主之操賞罰貴乎不私宰相之調陰陽在乎無忒苟天時之作沴繫人事之不修當責其誰是惟冢輔臣某中謝伏念臣頃遭際會遂冠臣鄰當堯舜之纂承乏皋夔之事業故聖心願治日極於諮詢而樸學素空卒無所補助居常省分屢已抗章雖引去之未容益自知其難處今此仲秋之始忽興淫雨之災京邑之間日纔信宿室居之壞十殆四三民胥歟然駭無所止伏惟皇帝陛下紹膺寶命勤究永圖言動之微亦無過舉政刑之謹必憲先猷惟高穹之甚明宜嘉應之遄格茲咎安在其來有繇蓋臣充位無聞素餐已久衆賢沈抑而不能彙進輿情鬱塞而不能上通旣汨五行遂隳庶務豈可以頑然自若恬不知慙伏望皇帝陛下稽合天心申明國典驗往誥兩暘之所自法前朝災異之所行敷告大廷亟行顯黜使四海之內皆知震曜之威則諸福之來是猶桴鼓之答臣無任

第二表

臣某言近以天雨之淫都城特甚乞從免黜以塞咎災蒙降批答不允者竊以三公之理陰陽冢宰之主政治蓋今首相之任誠繫四方之瞻官匪其人變不易發臣某中謝伏念臣素無他技徒偶亨期因緣大

馬之勞。忝冒鼎槐之冠。推賢避路。旣未遂於愚衷。竊位素餐。固不容於天理。而自皇帝陛下。紹承統緒。振
葺紀綱。思兼三王。待旦之勤已至。恭用五事。承天之德無差。何茲暴霆之來。頗戾至和之應。遇裁以懼。煩
引咎之過深。責相之愚。幸置刑而有舊。願正變調之失。特申竄謫之科。如此則風雨時而三階平。自銷民
沴。股肱良而元首起。坐見治功。臣無任。

第三表

臣某言。近以淫雨之災。乞從罷免。伏蒙聖慈再降批答不允。仍斷來章。宰職不修。當明於國憲。君恩過厚。
尙損於詔音。雖聖度之如天。欲自容而無地。臣某中謝。臣聞古者至治之世。風雨節陰陽和。百物歲登。萬
物時遂。蓋有德者進。而無德者退。有功者上。而無功者下。人事既得。天心自符。應之善祥。是若影響。恭惟
皇帝陛下。協大橫之兆。承桑盛之基。卽位以來。勵精爲治。臨朝親決。有唐堯之聰明。約己自修。侔夏禹之
勤儉。然猶吏多弛職。俗靡還醇。得非黜典之公。不先貴近。故俾政綱之紊。未振墮頽。今大異之所來。匪家
司而執咎。宜因此變。遂正彝章。縱寬斧鉞之誅。必用竄投之法。則人心自化。坐移偷薄之風。天監弗違。日
見太平之象。臣無任。

乙巳冬乞罷相第一表

臣某言。伏以佐天子理陰陽。外鎮撫四夷。內親附百姓。使卿大夫各得任其職者。宰相之事也。位高責重。
爲時具瞻。豈容非才。得久其地。今茲決去。必覬愈恩。雖獲重誅。義不能已。臣某中謝。伏念臣斷斷之技。無

殊衆人際會先朝遂塵蒙席雖夙夜自竭期有以報不次之遇而智局淺陋卒無云補伏遇皇帝陛下紹降聖緒力思致平臣復不能恢宣遠圖上助新政徒尸厚祿日積愧慙故自去歲以來凡三剖血誠請還柄任章十數上未蒙賜可包羞就職愈不遑安蓋以淫雨之災仍歲而發傷害禾稼漂摧室廬都城之內墊溺殊甚連陰絳月蔽遏大明塗巷之人指談時政此可謂能理陰陽乎西戎驕僭爲亂萌蘖時率醜類肆擾屬羌增備益師上煩宵旰此可謂能鎮撫四夷乎環畿之郡民罹歲荒餓殍流庸失職者衆賴天造垂惻賑給必周而重困之餘遽難完復此可謂能親附百姓乎滯固之識闇於任人不能廣擇羣材共熙庶務使賢者在下鬱而未伸此可謂卿大夫各得任其職乎有一於此被黜爲宜而臣衆事不修咎將孰執安得不自効無狀而恬然不退哉今幸郊禮休成邊垂事簡臣不勝懲迫願罷首宰之職避賢者路伏望皇帝陛下不奉私愛斷以大公俾臣外補小邦得安愚分彙進良輔以興治功自然陰陽日和衆沴不作四夷款服百姓乂安內外小大之職皆惕然相飭競著成效此則宗社無疆之慶蒼生莫大之福非特愚臣之幸也臣無任

第二表

臣某言近上表乞罷首宰之職避賢者路伏蒙聖慈特降批答不允者臣聞以道事君不能者止大臣之操也無德者退有功者上治世之法也若不能而不止無德而不退則是不知大臣事君之道而撓乎治世之法也故敢不避斧鉞再瀆宸聽臣某中謝伏惟皇帝陛下承四聖之緒興百年之業宵衣旰食垂意

萬務而臣任玷冢弼。歲月久甚以齷齪之守淺淺之見固無以光大新政而彈壓天下乃陰陽失序戎羯弗馴百姓未康衆職不舉四面之責畢叢於臣茲所以當食輶餐通夕不寐覆載之內若無所容儻陛下未賜罪誅使之善去畀以小郡與全始終此則天地含育之鴻造父母顧復之大恩百殞臣身未能報塞臣無任。

第三表

臣某言此者薦傾血懇祈罷冢司伏蒙聖慈特降批答不允者承命震駭不知所處重瀆天聽繼之死請臣某中謝臣聞之易曰鼎折足覆公餗其形渥凶孔子以謂德薄而位尊智小而謀大力少而任重鮮不及矣臣性椎而拙以道獨進先帝察其忠樸亟被顯任兩塵樞府遂冠之弼在臣圖報之志雖捐軀命而無所惜然而德不足以服衆智不足以慮遠力不足以勝任徒淹歲月莫建治功若非省分退身避賢者路不獨折足覆餗自貽形渥之凶其於國家爲害豈細也哉故自皇帝陛下臨御以來衆上奏封願還相印始陛下以未終諒闇去匪其時次陛下以邊事方興未當求罷臣雖上體聖意勉陪國論其如外涉要寵不誠之迹內懷空餐曠責之慙出入朝廷自無顏面況臣待罪首宰調燮無狀鉅異數見淫雨連月民用失職罔不愁歎今疆候無警禋禮慶成乃陛下采拔羣賢一新庶政以消天變之時也臣愚不勝愧慄伏望特舉兩漢災異之法而明黜之若以其攀附龍鳳依光日月塵汙重任將踰十年夙夜憂勞故疾增劇界以鄉郡稍從休息此則天地之造屈公議而全大恩臣非木石其心猶冀養氣而蠶完保衰而少強。

鑾鑠奮身以當陛下急難之用庶效毫髮以酬至仁臣無任

丁未因中丞彈不赴文德殿常朝待罪第一表

臣某言伏以朝之立制當謹奉行事有從宜寢成因習果被憲臺之劾敢逃刑筆之誅臣某中謝伏念臣久玷弼諧素慙椎鈍每俟延英之對動或踰時故趨宣政之班居常曠禮自擢彈擊交切兢惶伏望皇帝陛下斷在至公懲其不恪特正慢官之罪以清著位之聯臣無任

第二表

臣某言近以久廢朝儀遂招臺劾雖拜章而引咎顧充位以何顏臣某中謝竊以舉按不避權豪憲臣之風采刑罰弗思貴近治國之紀綱豈容非才而得幸免伏望皇帝陛下主茲直道斷以大公蚤議正於常科以聳聞於庶位臣無任

丁未夏乞罷相第一表

臣某言天聽甚高尙應誠而必答君仁至厚固無欲之不從矧瀝懲於先朝參避賢於冢任比申前志幸惻聖衷臣某中謝伏念臣起自孤生早丁盛旦無左右片言之援居疑丞四輔之崇忠義可爲自顧微軀之草芥是非難一何勝衆咻之波濤每內惕於虛孱日坐須於仆蹠自仁皇嘉祐之末逮英廟治平之間求解四五年凡奏數十上會國家之多故蒙詔諭之弗俞終承賜可之言許俟及朞而罷雖德音之未遠悵仙馭之難攀僥榮至茲負愧殊甚伏遇皇帝陛下乾剛獨運離照大明四海翹然聳聽惟新之治羣材

森若欣爲不世之逢而臣監拔非長設施滋懵天時數沴焉能知燮理之方病力何堪日以見昏疲之狀恬然不退衆將謂何伏望皇帝陛下施厚乾坤恩隆父母察危悰之匪妄矜薄技之已殫聽罷宰司俾從州任形之將敝儻麤獲於安休事有至難願再膺於驅策臣無任

第二表

臣某言近上表乞罷相任伏蒙聖慈特降批答不允者比傾愚款仰叨睿仁竊惟引去之當然自謂開陳之已至尙稽可報彌不遑安臣某中謝臣嘗歷覽前編欽聞善戒知止足者蓋道家之重瞰高明者亦神理之常故謙畏自持退則享安全之福滿盈不懼進而招顛覆之災況臣本乏材謀濫魁丞輔三朝遇主惟力報於聖知一紀備員固久妨於賢路加以病襟滋耗宰職殊墮以樸厚矯時而風俗愈偷以勤瘁勸功而官曹尙苟既不能振紀綱之頽敝又無以增堂陛之高嚴徒日積於罪辜將不容於竄殛茲所以懇還印綬免誤國家伏望皇帝陛下推大公以爲心監小慈而傷治不以舊人而牽愛必思新政之更張早需德音許還柄任畀之一郡得遂養於衰殘其若再生第知歸於化育臣無任

第三表

臣某言近兩上表乞罷相任伏蒙聖慈再降批答不允仍斷來章者陳力不能已薦傾於悃愞退人以禮猶過示於恩私雖詔諭之頻仍揆枉疲之忝冒不膺可報未已哀祈臣某中謝竊以桑聖重熙百年長楙顧此治安之本誠資輔翼之良惟隆名素望者可以久居豈多病不才者所宜愧處故臣自叨冢任當揣

孤誠雖有俾后堯舜之心而無躋民仁壽之策苟坐淹於歲月徒自取於竄誅所以屢叩先朝極陳愚款願解台衡之重再塵鄉郡之榮宸衷有示於矜從天下遽悲於遏密幸遇皇帝陛下纂隆不祚恢闡大猷發號令而一新振紀綱而盡舉日月所照皆知聖明中外之心罔不歡喜比率土大寧之慶是老臣當退之時伏望皇帝陛下俯諒危悰曲成先訓特寢斷章之答亟推如請之恩命守本邦進登賢弼衰骸少息惟歸感於上仁直道自將誓愈堅於素節臣無任

韓魏公集卷之四

表狀

丁未秋乞罷相第一表

臣某言臣聞之易曰天道虧盈而益謙地道變盈而流謙鬼神害盈而福謙人道惡盈而好謙是則物之盈者天地神人皆不與之況其望實本輕材謀素寡竊位二府殆將踰紀祿厚品極寵非其人可謂盈之甚者也此而不退禍固隨之臣某中謝伏念臣叨遇三朝濫都元宰以慙愚而待物自謂無欺於利欲以裁人焉能免過羣言稔積公議喧聞加以宿疹中狀繁機外擾尪疲之質寢以難支故自嘉祐末年以來衆貢血誠求罷皆國家多故不能遂請伏自皇帝陛下嗣承統業躬親聽斷紀綱日振法度日修而臣多病不才略無云補備員冢任其久如此所以抗章屢瀆懇辭重柄而蒙頒降手札委曲惇諭趨令就職殊未矜從忍愧強顏至於今日茲者先帝山陵復土萬世以安於臣子送往之心麤謂無恨若不於此時上還印綬以避賢者則是冥然不知進退之臣朝廷容之何以風勸天下伏望皇帝陛下念祖宗所付之重當昧旦圖治之始登用良弼共熙新政俾臣退補僻郡以盡悴軀示明上之大公全老臣之素節內惟犬馬之賤苟未填棄溝壑猶冀養完駕力再效分寸臣見於沿路至京以來聽候愈旨無任

第二表

臣某言近上表乞解相任蒙聖慈差中使降賜批答不允者臣聞老子曰功成名遂身退天之道也若其功不足以暴當世名不足以服天下祿位盈極不懼而退者豈非違天之道而自速其禍乎臣之無狀大過於此義當再瀆罪亦何逭臣某中謝竊惟自唐至於五代首宰之爲山陵使者事已求罷類多得請昨者昭陵復土而先帝尙進藥劑故臣不敢質之前例遽然引去逮先帝聖躬康復政治日新臣前後章數十上懇祈避位先帝始雖不允郊禮之後屢曾親被德音止俟朞年聽臣補外方俯期而露奏俄晚駕之莫攀皇帝陛下纂紹云初謹奉遺詔因山之事俾臣復當使任不容固辭今幸衆力輸勤反虞成禮況臣充位殊久宰政不修故疾嬰纏日難奉強上稽天道次察人言內量非才遠按故事夙夜愧恐無一可畱之理伏望皇帝陛下俯回睿監深照危悰廣覆載生成之恩悉孤愚進退之分許辭冢輔畀以小邦則多病之軀少諧休息妨賢之咎免及竄誅臣無任

辭免使相第一表

臣某言伏奉制命特授臣淮南節度使守司徒檢校太師兼侍中判相州加功臣食邑食實封者冢司備位屢陳懇去之宜故理班條重竊榮歸之幸顧便蕃之恩禮駭中外之聽聞愧弗敢當避期得請臣某中謝伏念臣忠雖自性慙不兼材久塵元宰之崇蓋辱棄朝之遇正塗是闢愚守難移責自任於四來謗不虞於三至再幸攀鱗之際會終逃積羽之湮淪加疾疹之內攻覺尪疲之日甚薦形剝牘力憇妨賢果回天地之仁獲假麾符之守然而敷五教而分治領於外者幾希建六蘚以臨戎兼爲相者殊重仍視帥臣

之秩俾充鄉郡之行仰君命之非常質人言而可畏伏望皇帝陛下謹守成之法推懋賞之公謂失簪履者雖不忘求舊之思而上印綬者豈可被無名之寵亟停異數免玷大猷少寬忝冒之誅更誓糜捐之報臣無任

第二表

臣某言伏奉制命特授臣淮南節度使守司徒檢校太師兼侍中判相州加功臣食邑食實封尋具表辭避蒙降批答不允者出守之恩顧衰疲之甚幸非常之命徒震駭而莫當辭懇雖勤詔晉未可重茲干瀆必覩矜從臣某中謝竊以三公之崇固非人而不授五教所敍惟處內而是宜矧兼真相之榮外領元戎之重在昔臣鄰之罷去無聞寵異之及茲雖曰殊私豈容清議伏念臣孤忠少與椎直近愚自升拜於冢司倏再踰於閨歷有尊主庇民之志而才不逮心負竊位素餐之譏而久增其愧屢殫誠請求解機繁終垂惻於上仁得爲藩於故里不意曲加優遇駢錫徽章名器假人必累惟新之政負乘致寇終傷卹舊之慈伏望皇帝陛下開博照之明諒危悰之盡亟寢告廷之誤以章馭貴之公病宰乞骸旣免冒塵之踰分勞臣任力皆知勸賞之無私臣無任

謝除使相判相州表

臣某言近奉制命特授臣淮南節度使守司徒檢校太師兼侍中判相州加功臣食邑實封尋兩具表辭免蒙降批答不允仍斷來章者宰職墮功莫副宵衣之治鄉邦得請重叨畫錦之行被恩典之特優顧人

言而甚愧。臣某中謝。伏念臣蚤繇科第。遂玷寵榮。不圖翰墨之進身。自竭涓塵而報國。備員諫諍。幾不免於竄投。奮命疆垂。實薦擢於艱阻。獨恃聖神之眷。誰開援助之言。仁宗皇帝知其守以孤忠。謂可屬之大事。慶歷之始。已擢貳於樞機。嘉祐之中。乃進登於宰輔。俄膺冢任。益荷殊知。當英廟之承祧。逮聖人之嗣。歷稠重遭會。罄竭愚庸。惟知社稷之安。豈顧家宗之末。然而萬微多務。一紀妨賢。爲國持平。敢自私於輕重。裁人所欲。故難免於愛憎。加疾疹之嬰纏。苦形神之耗敝。勉訖因山之禮。懇陳上印之宜。伏蒙皇帝陛下。念犬馬之力易衰。御名日月之明爲照。不罪再三之請。亟垂開可之音。進秩地官。剖符分社。建高牙之重。旣疏淮海之封。增故里之光。仍襲貂蟬之舊。叨塵之甚。今古疇偕。敢不思盡瘁於寢興。泯寘懷於內外。在邊在庭之責。惟驅策以當前。益堅益壯之心。至糜捐而後已。臣無任。

免冊命表

臣某言。伏奉制命。特授臣淮南節度使。守司徒檢校太師兼侍中。令所司備禮冊命者。地官之拜。已過冒於寵私。冊命之殊愧。重煩於優禮。臣某中謝。伏念臣素惟無狀。久玷冢司。茲懇避於繁機。得出臨於本郡。三公進秩。方深假器之譏。萬乘居尊。敢屈臨軒之禮。伏望皇帝陛下。念國容之良重。顧邦典之非常。申飭攸司。亟停異數。庶少安於夙夜。惟知荷於矜全。臣無任。

謝賜宅表

臣某言。伏蒙聖慈。特賜臣所賃官宅一區。叅具奏免奉聖旨。不許辭避者。補郡以行。旣極榮歸之寵。僦居

之久又叨卽賜之恩眷遇過優省循難處臣某中謝惟昔馭臣之法無先懋賞之方其疇不私所予甚謹若甲第之爲貺必大功而後宜而臣自玷家司訖無他效屢貢避賢之請方蒙從欲之仁獲守本邦何啻昔人之夸耀所膺異數絕非當世之擬倫已增積於厚顏復就頒於美宅稠重感幸夙夕震兢敢不加治藩垣乃情王室居無勢奪人知上賜以常存身靡家爲日愧忠言而自激臣無任

永興軍謝上表

臣某言奉敕差判永興軍府充陝府西路經略安撫使兵馬都總管已於今月十一日上訖避賢而罷方獲典於鄉邦改帥以行復誤膺於聖寄易晝錦還家之樂爲夕冰將命之憂雖已見於吏民懼不勝其責任臣某中謝竊以自陝而右惟雍處中昔日用兵嘗并制於諸路平時無事遂分總於中權然而勢不相維事難克協或左有防虞而右弗思於援助或彼專嚴戢而此姑尙於因循致邊備之寢隳實議臣之同病欲正元戎之法式欽睿算之精恭惟皇帝陛下稟大舜之聰明邁成湯之勇智謂堂上之兵必勝猶貴任人而閩外之制不專胡能治衆俾悉歸於節度當謹擇於材雄而臣久冒家司積成衰疹適懲章之屢瀆得本郡以榮歸不圖乘障之臣驟有邀功之舉一開邊隙上軫旰朝命更領於麾符敢幸安於桑梓慨然就道遽爾之藩心目所經頗諳詳於舊事精神之用已耗竭於當年茲惟仗國威靈挺身忠義導天聲之震怒宣上德之寬仁外以圖疆場之亟寧內以務編齊之無擾關中安堵苟羸底於小康鄰下養疴願祇還於故守荷諭言之無戲期病質之少休臣無任

戊申相州謝上表

臣某言近奉敕差判相州軍州事已於今月二十二日到任上訖殄寇無謀積勞生疹恩還鄉守衣繡免譏於夜行詔覲天闈錫馬屢膺於晝接遽辭軒陛卽見吏民顧忝幸以誠多撫孤孱而自惕臣某中謝竊以鄴都之舊壤素爲河朔之近封民風甚淳郡務亦簡兵廳明於紀律地不據於要衝他人得之尙衆稱於美任愚臣叨此蓋籍隸於本邦況臣至和之中大鹵爲帥以沈疴而露奏遂故里以分符比旌纛之再歸正星霜之一紀過家上冢寵薦極於存亡垂組夸鄉事更光於今昔此蓋伏遇皇帝陛下仁侔覆載德紹祖宗深憐桑牘之告衰乃命懷章而均逸帝宸賜見俯矜憔悴之容北道之藩不奪便安之請臣謹當奉行寬詔嗇養殘骸訪身之醫而念國之醫治己之病而及民之病膏肓可愈苟無二子之爲祿忠孝所存惟誓一門之圖報臣無任

判大名府三年乞閒郡第一表

臣某言竊以驥老而責千里固何益於馳驅鼯技之有五能已自殫於短拙輒披誠而取喻覬恤隱以推慈臣某中謝伏念臣素乏材謀麤持忠樸惟幸三朝之際會寢叨極品之光榮自移守於鄴都適三周於歲律事耽劇而心雖欲勉病所困而力不能堪今復風入四支日加攀痛氣畱兩脅內極攻戕蓋臣享厚祿而不知踰涯故天與沈疴而俾以自省思苟逃於凶折當上叩於聰仁伏望皇帝陛下隆天覆之恩念雲從之舊矜其久疾貸以餘生許辭將相之重權就易塵符於僻郡高明少抑免深鬼瞰之憂鐘漏向殘

猶存夜行之愧臣無任

第二表

臣某言近以久疾乞辭將相重權就移僻郡伏蒙聖慈特賜詔書不允者臣誠已至本深知分以辭勞君聽未回尙惜推恩而賜可薦敷危悃決俟愈音臣某中謝伏念臣四紀逢亨三朝竊寵良自無功而厚祿遂罹多病以久衰一辭東府之鈞衡再領北門之筦鑰莫非強勉以濟劇煩心雖云勞力有不逮然猶徘徊歲月偃息朝昏庶幾小康翻覺筋骸之愈憊若曰微效訖無毫髮之足稱雖恃聖仁實虞陰譴苟尙畱於要地將不保於餘生伏望皇帝陛下特軫孤臣曲全舊物許罷貂蟬之秩并收旄鉞之權簡靜小邦俾獲親於醫藥支離瘠質或未至於膏肓願垂從欲之慈敢忘糜軀之報臣無任

第三表

臣某言伏蒙聖慈以臣上表乞蚤愈前請就移邢相一郡特賜詔書不允者疾難自力蓋嘗止於不能聽未及卑尙莫從其所欲懼卽填於溝壑敢再犯於雷霆臣某中謝伏念臣生對盛朝蚤塵顯服惟慮國家之難報豈知才智之易殫逮處近司寢罹多病向辭上宰本圖勞逸之稍均暨尹別京翻困劇煩之滋甚矧流年之三易當疾疹之久攻庶務糾紛一身勉強生有涯而足愴神太用以幾亡若將相之榮苟坐恬於尸素則寒暑之疹將遽及於膏肓伏望皇帝陛下感動至仁矜全舊物回聖后燭幽之照察老臣知退之心許上戎旃免司畱鑰付之間郡息肩俾遂於少休顧此餘生沒齒難忘於再造臣無任

第四表

臣某言近三上表願上戎旃免司畱鑰付之間郡俾遂少休伏蒙聖慈特降詔書不允者罔功納節以疾請麾三嘗自陳一切未許行恐餘生之莫保敢干萬死以有聞臣某中謝伏念臣中實枵然生而慧甚寵榮欲報勇於遇事而輒爲筋力既衰失在知難而未止比掠將頗之質疊傾必至之誠厚祿戒貪願止淮南之旄鉞小藩乞守免當河朔之喉襟尙未矜從尤激危懼蓋殘軀不息漸歸溝壑之爲鄰空食寢深轉暴涓埃之無補伏望皇帝陛下特回天聽俯徇物宜不遺螻蟻之微情各任鷁鷀之常分有民人足以爲政畀支郡以養疴雖將相許其辭隆絕公朝之假寵旣完素守仍息久勞恩施難名報償何有臣無任

第五表

臣某言近四上表以久疾不堪劇事到任已越三年願納旄節就移邢相一郡伏蒙聖慈特降詔書不允者病難任劇職合辭隆開可不時顛擠無日危迫敢殫於血懲哀憐願軫於皇情臣某中謝伏念臣起自孤生初無遠業祿常過量寵榮最早於他人福不勝災疾疹遂纏於今日所以憇還將相之印力避兵民之權庶就閒州以舒瘠質私計已決愚誠不移雖委寄誤深不謂三年之已久而衰疲待報翻嗟一日之爲長矧是戎旃固非虛器無功以領於義未安使老臣兩失於寸心豈仁主曲全之本意伏望皇帝陛下特回天鑒俯途物宜就更麾符許上旄節驅馳鷺足免令濱死以未休治養殘骸或冀餘生之可保大恩難狀丹抱奚論

北京謝再任表

臣某言。昨蒙聖慈差降中使齎賜敕告。改授永興軍節度使判大名府再任。尋叅上章。乞免換節制之命。伏奉詔恩。特允所乞。仍別降敕再任者。憇幅屢陳。從欲許還於新節。衰疲自力。竭能勉撫於舊封。委寄逾深。顛隣是懼。臣某中謝。伏念臣本緣一介之曲學。歷被三朝之誤知。自解宰鈞。繼紓守綱。蚤年遇事風霜。不計於殘軀。晚歲纏疴。藥餌乃同於常膳。比引揣躬之分數。裁辭劇之章。力匱閒州。少安病質。而恩生望外。事與願違。俄更西雍之帥旄。尙付北門之畱鑰。所以極論去就。仰贊聰明。幸寵利非事君之宜。必冀寢加恩之命。策疲鷺雖老臣可強。敢不拜再任之休。訖奉俞旨。兩諧愚懇。此蓋伏遇皇帝陛下。至仁天冒。盛德海涵。器使庶工。愛偏舊物。雖俊傑甚衆。並試有爲之時。而尪瘠之餘。惜投無用之地。敢不勤宣條教。兼拊兵民。儻溝壑之未填。尙乾坤之可報。臣無任。

判大名府再任滿乞郡第一表

臣某言。臣聞陳力不能者止。斯善省躬。非位而居曰貪。誠爲竊祿。顧衰骸之難強。加職事之不修。重踐丹愚。終期軫惻。臣某中謝。伏念臣材資朽拙。際會休明。十稔近司。愧涓塵之無補。一身多病。嗟蒲柳之易衰。向雖蒙均逸之恩。尋薦易極煩之地。惟是北門之重。正居中冀之衝。使傳交馳。河防日急。神識已昏。而治紛拏之務。筋力已憊。而躬應接之勞。愈不自勝。其誰見恤。頃周三歲。屢叩九闕。願還使節之榮。復守鄉邦之舊。螻蟻之誠。斯至冕旒之聽。莫回罷弗安。尪瘦孰訴。今茲再任。實滿四年。戰兢而履冰淵。竊能免過。

疾痛而呼父母。豈不加憐。伏望皇帝陛下念犬馬之疹日深。閔桑榆之景甚迫。俯矜危懇。特示至仁。許旄印之並收。就里閭之差近。俾更偏郡。以養殘軀。公幹之臥漳濱。稍延視息。子牟之居海上。敢忘朝廷。斯惟洪造之曲成。雖盡餘生之曷報。臣無任。

第二表

臣某言。近上表以再任實滿四年。多病不勝。乞收旄印。就里閭之近。改一偏郡。以養衰殘。伏蒙聖慈特賜詔書不允者。陳久疾以辭煩。蓋申前請。錫溫言而垂諭。尙闕俞音。輒恃至仁。再傾危懇。臣某中謝。伏念臣智能甚短。學術尤疏。誤叨眷遇於三朝。徒守樸忠之一節。自勉當於都會。惟務罄於駕材。疹積於中。實覺不支於往日。事紛於外。愈知難強於殘年。故前後叅形於封章。而誠悃未蒙於省察。況忝魏臺之寄。四更堯歷之新。一道之重。而心不爲不勞。連任於此。而時不爲不久。質於常典。率皆受代而有期。豈茲老臣。獨使向隅而無訴。伏望皇帝陛下。推父母之親愛。開日月之至明。垂憫負薪之憂。回照覆盆之下。俾收使節。退守偏州。庶幾事簡而責輕。少安悴質。苟得氣完而神復。可保餘生。未填溝壑之間。敢忘乾坤之報。臣無任。

第三表

臣某言。近兩上表。以再任滿久疾。乞納旄節。就移近鄉一郡。伏蒙聖慈特遣中使齋賜詔書不允者。屢引疾以訴天。願均勞而易地。難動蓋高之聽。未推從欲之仁。罔避譴誅。必期於允。臣某中謝。伏念臣本無他

技偶對聖時荷恩逾丘岳之崇報國鮮涓塵之效向解鈞衡之重欲蘇犬馬之疲素心忽戾於初終重寄尋更於西北昔叨鄉郡優閒纔數月之閒今任別都荏苒已四年之久坐感歲時之易失默傷齒髮之寢衰況一^支_叶近感於風摶顧積日可憂於殘廢若使尙當於衝會必將遽及於膏肓伏望皇帝陛下察此哀鳴出於至懇卹晚塗之甚迫閔朽質之增羸未遺簪履之微特軫冕旒之念趣收印鉞就假麾符多病不能願效汲生之治故鄉歸老漸希疏傅之行儻得遂於餘生敢少忘於再造臣無任

北京河決待罪表

臣某言大河所次全魏居衝苟先備之不嚴固守臣之當咎臣某中謝伏念臣衰疲日甚寄任過優雖駕力之強扶實病心之久耗惟茲經瀆爰設巨防於舊而無用之間失豫作不虞之計一罹淫雨遂致橫流矧此屬寮率皆盡瘁於耳目之難及數倚攸司在几案之所勤日常不暇悉由臣恬無遠慮昏不過憂蚤圖營繕之方上軫宵旰之念伏望皇帝陛下申明彝憲訓飭多方不徇一臣之私恩而屈四海之公論特加竄細以謝傷痍其本府通判職官等從來實不關預抹溢後來皆奔走救扞備見夙夜用心乞並從寬貸臣獨甘重責無任

癸丑相州謝上表

臣某言奉敕差判相州軍州事已於今月六日到任上訖別都再滿難力勉於殘軀故里三臨見恩殊於舊老已班條教徧曉吏民旣知聖君博愛之仁又慰前守復來之望臣某中謝伏念臣孤忠少與他技非

長荷桑朝含育之私玷上宰弼諧之久向辭鈞軸冀息衰疲會西鄙之繹騷繼北方之震溢復當憂責莫遂安休補鄉邦屢得於虛名領帥任通踰於再閏矧是鄴京之重素推朔部之雄事鞅掌以裝懷殊無少閒病纏綿而仍歲寢以不支及茲當代之期輒露乞憐之訴願上節旄之過寵特更桑梓之近州始錫溫言諭河內所畱之意卒膺可詔有會稽如請之行臣嘗考載籍之名臣記本朝之達宦凡得被典城之寄幾何諧衣錦之榮如臣稠重振古希闊展先冢而松楸動色過里門而耆稚相歡此蓋伏遇皇帝陛下廣覆無偏大明必照顧蟲魚之細尙惟恐於傷生況簪履之恩固不忘於軫舊乃厚曲成之造俾延將盡之年敢不調養病襟激昂老節不以鄉閭而爲苟且之政不以疾疹而幸尸素之安氣體遂完或可備國家之用筋骸益瘁卽當求田里之歸斯犬馬之所在在君親而何報臣無任

謝賜生日禮物表

臣某言伏蒙聖慈云云者親生在旦方萃感於己孤君賜維時遽拜嘉而至渥寵榮所集震厲無從臣某中謝伏念臣底滯天資迂疏時用特緣一介之術業歷備三朝之弼謨馨竭短才猶坐兼於衰鉞徘徊重祿未歸就於田廬左弧第謹於私庭中詔忽傳於子舍衣頌內府馬錫天閑韞葉有輝器文加鏤生而維翰實慙山甫之降神今也所蒙又異桓榮之稽古此蓋伏遇皇帝陛下愛深舊物禮厚孤臣垂記始生猥加異數敢不益殫驚怯少答龍光庶逃不稱之譏仍謹且乘之戒上恩既重臣命愈輕臣無任

賀收復熙河等州表

臣某言伏聞熙河路經略司奏修復河岷等州百官稱賀者隴外數州讐天威而率順廷中百辟慶廟算之惟精凡在幅員畢同欣躍臣某中謝伏惟皇帝陛下雄材大略高出前王破蹟闢休夐隆百代雖內修於文德亦外闡於武功將帥得人闢國蓋踰於百里臣鄰歸美舉觴咸薦於萬年臣方守郡章阻陪朝著聽膚公之來上知聖治之日新臣無任

謝放免勸勅相州差壯城兵士表

臣某言本州准樞密院劄子奉聖旨河北西路轉運司近奏勅相州違條差壯城兵士往諸處收買修造物色已差磁州通判季悰取勘並特放免者郡條紛冗難逃誤失之愆使部按繩當坐曠曠之責特荷聖明之燭隱遽從寬貸以推恩臣某中謝伏念臣氣劣蚤衰心疲易耗自鄉閭之竊守嬰疾苦以彌年力不堪煩果自貽於譴咎上猶加卹俄曲示於矜容此蓋伏遇皇帝陛下大度淵深至仁天覆謂求諸小過則動觸於常刑故眷及舊臣使衆知於優禮方願歸於畎畝敢少忘於國家臣無任

甲寅秋乞致仕第一表

臣某言知足所以不辱道家之至言謝病豈必待年先儒之高論顧宿疴之寢劇嗟悴質以難支欲逃瞰室之災敢露乞骸之請臣某中謝伏念臣性資甚慙學術非長徒被眷於三朝悉叨榮於上宰力不勝任居懷覆餗之憂天責其盈常困負薪之疾屢剗由衷之奏獲從補外之行薦持西北之要權莫副朝廷之重寄向辭會府還守本邦垂組夸鄉固多榮耀息陰止影少幸安休而臣積恙有年良醫莫辨氣攻胷脅

痛甚戈矛之所傷。釁起膏肓。理非藥石之能近。苟尚貪於厚祿。必過喪於餘生。伏望皇帝陛下。特推天地之大恩。俯念桑榆之末景。許上還於印綬。俾退處於衡茅。則臣得以釋去吏勞。保完神幹。庶獲萬全之靈劑。更施一溉之微功。在刪畝以愛君。敢忘忠國先犬馬而墳壑。是亦甘心儻賜矜從。仍乞只守本官致仕。千冒旒辰。臣無任。

第二表

臣某言。近以衰老多病。上表乞守本官致仕。伏蒙聖慈特差中使齎賜詔書不允者。弗瘳之疾。固日極於尪疲。將盡之年。竊自憐於光景。願辭隆於將相。得歸佚於林泉。未賜恩俞。再祈軫惻。臣某中謝。竊以不能者止。斯爲量力之宜。厥位惟危。豈有苟安之理。矧微生之寡祐。感奇療以難名。當血氣之未衰。尙任攻治。逮筋骸之益瘁。莫可支持。皆由臣曠責無慙。冒榮不退。天旣惡其盈滿。鬼亦瞰乎高明。致茲陰譴以何逃。獨恃君仁而可訴。伏望皇帝陛下。曲矜舊老。俯照孤誠。念臣如禮休官。止有二幕而甚近。閔臣纏疴莅事。曾無一日之少安。釋其糾羈。遂被薦菽。許乞身於田里。覩延命於朝昏。漏盡而行。免貽譏於識者。日入而息。庶同樂於耕民。使獲全於始終。惟永荷於仁聖。臣無任。

第三表

臣某言。近以衰老多病。兩上表乞守本官致仕。伏蒙聖慈特差中使齎賜詔書不允者。竄漳之疾。久已深根游岱之魂。日將去幹。苟不嬰於職事。得退伏於私居。尙覩衰殘。稍延視息。仰愈恩而未下。幸哀訴以終

憐臣某中謝竊以千載逢時適其志者古實難偶萬鍾受祿患其失者人之常情況臣丁全盛之期遇至仁之主爲郡處鄉閭之便忝官兼將相之榮豈不欲憑藉龍光畱連富貴忍自投於閒寂甘取誚於昏愚蓋臣以疾苦支離力難勉強據疾顛之位既居常而弗安指告勞之年又將及而無幾歎崦嵫之漸迫陳悃愞以再殫痛甚而慈親莫聞誠至而高穹必動伏望皇帝陛下御名天地無垠之施閔冰炭不治之疴貸此餘齡矜其末路賜以安居之寵息茲駑駕之疲使朝廷有知止之臣足光聖政顧魚鳥得遂生之樂免負慙顏臣無任

乙卯夏乞致仕第一表

臣某言臣聞祿者所以食功無功則謂之虛受力者以其堪事廢事則謂之空官深惟二者之譏其實兼之已久責雖未至誠豈能安願乞垂年之骸益隆善養之德臣某中謝伏念臣資靈椎鈍術業榜疏遭遇盛時徊翔近列誤荷三朝之注意未嘗一事以辭難前述具存大明洞照去歲以久嬰疾恙日耗冲和意惰神昏肌銷骨立屢拜章而告老庶得暇以營醫藥錫詔音未容謝事湛恩淪髓積愧叢心嗟薄祐之所鍾困宿疴之愈劇雖牽強策勵不克支在公之役而語默動靜未曾忘曠職之憂滿盈之屯晨夕可待況臣叨臨本郡已越再朞欲宣力於要藩則支離而難強遂偷安於故里實尸素以堪羞復去從心之年止於周歲之近敢重干於天辰期安退於田廬伏望皇帝陛下畱聰明睿智之神廣偏覆包函之造俯察豚魚之懇垂矜蒲柳之衰亟推從欲之仁俾遂歸休之請穀神閒境黨沈痼之有瘳肉骨餘齡皆聖恩之所

賜如允所請只乞以本官致仕干冒宸嚴臣無任

第二表

臣某言近上表陳乞致仕伏蒙聖慈特差入內內侍省內東頭供奉官句當內東門司劉惟簡齋賜詔書不允者衰年病久懇乞殘骸睿眷恩隆曲矜舊物闕愈音而未下撫瘁質以何安再此冒聞終期得請臣某中謝竊以享萬鍾之祿者人情之所戀被六極之疾者天譴之有來蓋祿過者戀之不祥疾熾則來其示罰苟災生而不避將鬼得以加誅而臣際會三朝周旋二府竊崇高之位而出臨桑梓無尺寸之效以上報國家坐越再朞日嬰宿疹里民爲之指笑鄉老相與訾譏謂臣筋力已疲旣不可奮當繁劇鐘漏云迫又不能速向安閒聆羣議之交喧顧自容而無地於何逃責是必歸休伏望皇帝陛下道廣照臨恩全終始閔老臣之無狀得危療而弗瘳賜以餘齡遂其退節馳心黃屋寧忘魏闕之思訪道赤松豈獨漢臣之幸臣無任

第三表

臣某言近上表陳乞致仕伏蒙聖慈特差入內內侍省內東頭供奉官句當內東門司梁從政齋賜詔書不允及有殿直崔汝良押賜到制告敕牒各一道蒙恩改授臣永興軍節度使令再任者老病不任方露乞骸之請聖宸未諒俄蒙換節之畱事絕戾於本心日不知其自處力當避免卒覩哀憐臣某中謝竊以君之御臣進退不可差於禮臣之守分去就不可失其宜故禮之差則非治國之大經宜之失則爲終身

之至辱。伏念臣久尸重祿。常苦宿疴。自叨任於安閒。亦寢成於尪劣。去歲以膏肓作癟。寒暑交攻。不惟皮骨之僅存。固已精神之並耗。屢勾歸休之適。終沈賜可之音。壹鬱奚伸。昏冥愈甚。此幸本邦之再歲。輒申前懇而一言。豈謂誠不上通。恩非所望。特易帥旄之重。俾仍鄉郡之優。雖陛下求舊之私。在一時而孰擬。而愚臣要君之迹。縱萬死以何明。伏望皇帝陛下。監務燭微。道先貴恕。念辭榮而受寵。理實難安。矜積疹以垂年。許從謝去。收其渙汗。貸以餘齡。使一介之守不虧。獲全終始。則萬乘之仁至厚。曷報生成。臣無任。